

## Meje Po Carte Pablo Tatina, Roma Tomarapiwi Tatinatsi

*Meje yabara poxonae Pablo tamropata pitaba xua tatina pomonaetha pomona Roma tomarapiwi*

<sup>1</sup> Xan, Pablon, apara pon tanacuichin amanya Jesucristo nexa. Nacom newaba yawa tsana nenota xua necana exana Jesucristo pia peitorobi jiwi jiwana tatsin xua tacueicueijeinexa Nacom pia pecapanenebiyae diwesi jume.

<sup>2</sup> Barapo pecapanenebiyae diwesi jume caena bayatha Nacom yabara tsiwuna muxu duta Nacom pia peitorobi jume pepaebi jiwitha poxonae barapomona tina Nacom Pejume Diwesi xua Nacom yaputane exana, po diwesi xua Nacom pia pexeinya jume diwesi tatsi. <sup>3</sup> Barapo diwesi yabara tinatsi Jesucristo, pon Wanacanamataxeinaein, pon Nacom Pexanto tatsi. Poxonae bapon Jesucristo be jiton coyeneya naexana, xaniwaicha bapon David pia pemomoxi susato jiwana pinsi tatsi. Barapo David pon caena bayatha Israel nacuapiwi itorobiya pia pepa peewatsinchi.

<sup>4</sup> Poxonae Nacom pia peayapusu itorobi coyenewatha Jesucristo pon Wanacanamataxeinaein asu exanatsi petupa cuiru coyene weya, bapoxonae Nacom tsita itapeinya xeina jiwitha xua bapon Jesucristo bara Nacom Pexanto tatsi po pexantoxae tatsi pia jumope tunaxu tatsi juntu coyene xanepana Nacomtha.

<sup>5</sup> Jesucristo pata tana neantobexae, Nacom pana cata pocotsi coyene xua pana netsita coyene xanepana xua pata tana necana exanaewa tsane Jesucristo pia peitorobi jiwi tatsi. Nacom pana itoroba pata cueicueijeinexa daxita nacua jiwitha xua barapomona pejume cowuntsinexa

yawa xua peexanaenexa pocotsiwa xua Jesucristo itoroba. <sup>6</sup> Daxita barapomonaē pomonaē jume cowũnta, paxam barapomonaē jiwana pam. Nacom irũ paca waba xua paxam Jesucristo piamonaē tatsi jiwana pam painya ne-naexanaenexa. <sup>7</sup> Daxita pam pacata tinatsi pomonaē pajinompame Roma tomaratha, pomonaē pam xua Nacom paantobem. Yawano Nacom paca waba xua bapon painya tsita nenajũntũ coyenein xanepana exanaenexam tsane. Barabũ Nacom, pon Waxa, irũ Jesucristo pon jiwĩ Pecanamataxeinaein baponbe paca yawenaenabe pia paca necaantobexae. Mataũtano baponbe barabũ jũntema jinompa paca cana exanaena.

*Meje yabara poxonaē Pablo ichichipa xua pesiwa ponaewa Roma tomara*

<sup>8</sup> Matha copiya Jesucristo wũn caununaya tsipaeban Nacomtha, janje tsaibin: “Nacom, yabara jũntũ coyene weiweinan Roma tomarapiwi, tsipei daxita nacuan jiwĩ yabara paeba xua pinae barapo Roma tomarapiwi xaniwaicha beta cajume cowũnta”, jan tsaibin Nacomtha. <sup>9</sup> Ajũntũyapusũya Nacom tanacuitan. Nacom tacueicueijan pia jume diwesi xua pocotsi jume Pexanto tatsi tayabara paeban. Barapon Nacom bara yatsicaewa neyaputane xua matowa paca yabara nanta xeinaeya tsipaebaponatsi barapo Nacomtha. <sup>10</sup> Nacomtha yainyabeiban xua icha bapon ichichipa xua bara metha neitacũpaetsipa xua matapainya tapaca siwa ponaewatsi tsainchi. <sup>11</sup> Paca siwa ponaeinchi tsipei bichocono ichichipan xua tapaca taewatsi. Ichichipanno xua tapaca cuidubiwatsi tsainchi xua Nacom pia Pejumope tũnaxũ tatsi painya nepaca cayawenaenexa tsane painya jũntũ coyenewatha. Vapoxonaē paca jũntũ coyene ayapusũ exanaena. <sup>12</sup> Pocotsiwa xuaunxuae yabara paeban apara xua waxainchi caemonaē

nantiya wanajuntũ coyene tsacabinexa xua juntema waji-nompaenexa. Baxua nacana exanaeinchi poxonae wanat-sipaebeibinexa Nacom Pejume Diwesi, po jume diwesi pajume cowantame xua irurũ jume cowantandũ.

<sup>13</sup> Tamonae pam, pomonae irũ painya nejume cowantsiwixae Jesucristo. Ichichipan xua payaputaneme xua matowa ichichipeiban xua tapaca siwa poneibiwa tsaibi tsainchi. Ichitha beya anoxuae jopa neitacũpaeyo xua tapaca siwa ponaewatsi. Ichichipan xua tapaca cuidubiwatsi Nacom Pejume Diwesi xua pejume cowantsinexa pomonae jopa copiya jume cowantsiyo, xua irurũ pejuntũ coyene tsacabinexatsi pomonae copiya jume cowanta. Baxua barichin tsane icha bayatha ichin ichamonaetha xua poxonae yawenan pomonae jopa judiomonae naexanaeyo xua pejume cowantsinexa.

<sup>14</sup> Nacom neitoroba daxita jiwitha. Daxota bewa cueicueijan tsane Nacom Pejume Diwesi daxita jiwitha, bequein metha bara tomarapiwi tsipae, ichacuitha metha bara bequein unupiwi tsipae, bequein metha peyaputaewi tsipae, ichacuitha metha bequein jopa peyaputaewi tsipae. <sup>15</sup> Daxota bichocono ichichipan xua paxam irũ tapaca cuidubiwatsi tsainchi Nacom Pejume Diwesi pomonae pamxaem xua painya nejinompaewi pam Roma tomaratha.

*Meje yabara xua Nacom Pejume Diwesi xeina peyapurusũ*  
itorobi coyenewa xua jiwi pecapanenebiwatsi

<sup>16</sup> Jopa ajumeurinyo xua tacueicueijejewa Nacom pia pexeinya jume diwesi. Poxonae jiwi jume cowanta barapo diwesi, Nacom capanenebiya exana barapomonae abe pia peexanae cuiru coyenein weya tatsi pia peyapurusũ itorobi coyenewatha. Nacom capanenebiya pomonae pia pejume cowantsiwichi, matha copiya judiomonae, bapoxonae irũ pomonae jopa judiomonae naexanaeyo.

<sup>17</sup> Barapo diwesi naca yaputane exana xua Nacom naca cana jũntũ coyene xanepana exana bapontha, xua jopa watsita natsicuentisixae xua abe waexanaexae bapontha. Nacom baxua naca cana jũntũ coyene exana saya poxoru Ʃ meisa wayabara jume cowũntisixae pocotsiwa exana-paeba, bapon. Nacom Pejume Diwesitha jeye baxua yabara: “Pontha, pon Nacom jũntũ coyene xanepana exana pia peyabara jume cowũntsinxaetsi pocotsiwa exanapaeba bapon ataya tsitecaeya poponaena”, jei Nacom Pejume Diwesitha.

*Meje yabara xua jiwi penatsicuentisixae Nacomtha abe pe-exanaexae*

<sup>18</sup> Waxainchi yaputainchi xua Nacom anaepana pomonaetha pomonae abe peexanaewi. Daxota itorobica athawetsica po coyenetha xua barapo jiwi atene peexanaewatsi. Nacom anaepana, jiwi abe peexanaexae bapontha yawano abe peexanaexae ichamonaetha. Mataũtano barapomonae abe peexanaexae, jopa copatsiyo xua bara pia jũntũ coyeneintha peyaputaewa pexainyei jumein. <sup>19</sup> Barapomonae bewa xaniwaicha bayatha yaputaena po coyene xua Nacom pejũntũ coyene tatsi. Tsipei bayatha Nacom tsita najũntũ coyene itũta barapomonaetha. <sup>20</sup> Jiwi jopa itacũpaetsi xua paeba xua pinae jopa Nacom yabara yaputaetsi. Beya poxonae Nacom aena forota barapo cae pin nacue, jiwi yaputane xua Nacom xaniwaicha popona yawa pia peayapusũ itorobi coyenewa bapana jopa weraweracae tsane. Jiwi yaputane baxua poxonae tane pocotsiwa Nacom forota bequein Nacom jopa taetsi. Daxota jiwi natsiaenae cuenta exana Nacomtha pia coutha poxonae abeya paeba xua pinae jopa yaputaetsi Nacom. <sup>21</sup> Bequein barapomonae yabara yaputane xua bara Nacom popona, daichitha barapomonae jopa barũ

cui itura jinaeyo Nacom ponxae xua yatsicaewa pia pepa Nacom tatsi. Yawano barapomonaе jopa jei tsaibiyo Nacomtha: “Nacom, pajantа coyene weiweinan xua pocotsiwa painta neexanaewamxae”, jopa jei tsaibiyo. Saya meisa barapomonaе yabara nanta xeina dubenanaebiya pocotsiwa xua pepawi. Saya abeya nanta xeina dubenanaebiya xua daxota jopa yaputaeyo pexainyei jume. <sup>22</sup> Bequein barapomonaе paeba xua pinae peyaputaewi daichitha be pomonaе xua jopa xapain peyaputae jiwi naexanaeyo. <sup>23</sup> Barapomonaе jopa wᵛnae jainchiyo Nacom, pon ataya tsitecaeya popona. Saya ɱ wᵛnae pejainchi ibo nacomᵛn, po ibo nacomᵛn be tsita jiwichi xua saya peweraweracae coyene. Yawano icha ibo nacomᵛn exana xua xuan be peyapupunaewi, yawano po ibo nacomᵛn be jomon xua petompacuetontha pona, yawano po ibo nacomᵛn be duwein xua pecobe xeina yawa pesito xeina.

<sup>24</sup> Daxota Nacom copata xua barapomonaе bara moya peexanaenexa abe peexanaewa be pocotsi coyeneya xua ichichipa. Baroxonaе barapomonaе nantiya nata exana pocotsiwa xua aura exanatsi pia pepontha. <sup>25</sup> Baxuan Nacom copata xua peexanaewa barapomonaе, tsipei barapomonaе jopa jume cowᵛntsiyo Nacom pia pexainyei diwesi jume. Saya barapomonaе itapeta ɱ jume cowᵛnta xua xuan penaerabi diwesi jumein. Pocotsiwan Nacom forota baxuan barapomonaе be pia nacomᵛn cana exana pejume cowᵛntsinexa, matautano xua barapomonaе pe-barɱ cui itura jinaenexa xua wᵛnae pejainchiwa nexa. Barapomonaе jopa wᵛnae jainchiyo pepa Nacom, pon daxita peforotsin. Barapon waxainchi bewa wᵛnae jain-teibinchi xua ataya tsaibi tsane pia peexaneibixae waxainchi nexa. Je, bara ichi tsane.

<sup>26</sup> Daxota Nacom copata xua barapomonaе bara

moya peexanaenexa pocotsiwan xua aura exanatsi pia pepontha pocotsiwan abe coyenewa peichichipaewan. Matautano barapomonaē pia yabuxi tatsi jopa equeicha exanaeyo po coyene yabuxi ba exana poxonaē peichichipaewa pia pebin. Baroxonaē barapo yabuxi exana xua cae yabuxi naichichipa.<sup>27</sup> Barichi pebiwi aichaxaibi po coyene pebiwi ba exana poxonaē peichichipaewa pia petsiriwa. Saya meisa bichocono penthutontha ichichipa exana xua cae pebiwi naichichipa. Barapo pebiwi nantiya nata exana pocotsiwa xua pin ura xeina exanatsi. Barapomonaē abe peexanaexae Nacomtha natsicuenta. Daxota Nacom copata xua barapomonaē pia pepon atene nata exana.

<sup>28</sup> Poxoru barapomonaē jopa ichipaeyo xua jopa pejume cowuntsiwa Nacom, daxota Nacom copata xua barapomonaē moya bara abeya penanta xeinaenexa. Matautano Nacom copata xua barapomonaē bara moya exanaena pocotsiwan jopa bewa exanaē pocotsiwa xua abe. <sup>29</sup> Barapomonaē jopa juniya juntu coyene yucaetsi xua peabe coyenewan. Barapomonaē nasi cui weiweina exanaduta, yawano abe exana ichamonaetha. Yawano exana xua ichichipa pocotsiwa ichamonaē xeina. Yawano ichichipa xua ichamonaē atene exanatsi. Barapomonaē uwa, ichamonaē uwatsi. Yawano barapomonaē juteba, ichamonaē jutebatsi. Yawano penabi coyene exana. Yawano barapomonaē jiwi muxujainyaba nawita. Yawano barapomonaē bichocono piamonaē caseba nawita. Yawano caemonaē nabaru paxapaxei xua ichamonaē abe yabara paebatsi. <sup>30</sup> Yawano barapomonaē jume atsaquiya abeya yabara paeba xua ichamonaē pocotsiwa exana. Barichi barapomonaē Nacom casebatsi. Yawano barapomonaē biatane ichamonaē. Yawano pia coutha penayabara paebiwi xua pinaē peainya cui jiwi. Yawano

barapomonae peabiwi xua ichamonae aebatsi. Yawano jeita nawita pocotsiwan xua peabe coyenewa. Yawano jopa exanaeyo pocotsiwan xua paxeiwi itorobeibatsi. <sup>31</sup> Barapomonae jopa ichichipaeyo xua Nacom peyabara yaputaewatsi. Yawano barapomonae jopa jume xainyeya exanaeyo pocotsiwan xua exanapaebeiba. Yawano barapomonae jopa xapain antobeyo ichamonae. Yawano barapomonae jopa ichamonae yabara jüntemainaetsi xua abe exana. Yawano barapomonae jopa ichamonae xapain yabara nanta xeinaetsi xua peyawenaenexatsi. <sup>32</sup> Barapomonae yaputane pocotsiwa xua Nacom itoroba. Yawano barapomonae yaputane xua pomonae barapo peabe coyenewan exana bewa werapaena. Bequein barapomonae yaputane baxuan ichitha awiya abe eexanapona. Yawano barapomonae jüntu coyene weiweina, poxonae ichamonae iru barapo peabe coyenewan exana.

## 2

*Meje yabara xua Nacom yabara paebina penatsicuentsiwa jiwi, xua yatsicaewa pexainyei coyenewatha*

<sup>1</sup> Paca tsipaebatsi paxam judiomonae jiwana pam pomonae xua ichamonae pecayabara nanta xeinaewichi xua icha abe exana xuano xua icha jopa abe exanaeyo. Paxam jopa bewa pajam tsane ichuntha: “Xam abe exaname, natsicuenta exaname Nacomtha”, jopa bewa pajam tsane. Tsipei poxonae ichun payabara paebame xua penatsicuentsiwa xua abe peexanaewaxae, apara painya coutha panatsicuentame Nacomtha xua abe painya neexanaexae. Poxoru bichocono abe painya neexanaewi icha ichi pomonae payabara paebame xua penatsicuentsiwa xua abe pia peexanaewaxae. <sup>2</sup> Waxainchi yaputainchi xua Nacom yabara paebina daxita jiwi xua penatsicuentsiwa

xua abe peexanaexae xua yatsicaewa pexainyei coyenewatha xua abe peexanaexae bapontha. Poxonae Nacom yabara paebina xua penatsicuentsiwa jiwi, bapon paebina xua pomonae barapo peabe coyenewan exana bewa peraxa jubebinchi xua atene tsane. <sup>3</sup> Paxam ichun payabara paebame penatsicuentsiwa xua abe pia peexanaewaxae. Apará painya coutha panatsicuentame Nacomtha xua iru paxam painya nebarichiwatham xua abe painya neexanaexae. Paxam jopa paca itacupaeyo xua painya nepanenebiwa poxonae Nacom atene exanaena xua poxonae yabara paebina jiwi xua penatsicuentsiwa xua pomonae abe peexanaewi. <sup>4</sup> Paxam paaichaxaibim poxonae Nacom bichocono peichichipaexae xua painya nepaca yawenaewa xua painya nepaca antobexae. Yawa paxam paaichaxaibim poxonae Nacom abu saya juntema ewata xua beta pacata exanaena xua pomonae pamxaem xua pajume cowuntsiname yawa atene paca exanaena pomonae pamxaem jopa painya nejume cowuntsiwi. Nacom baxua exana pia xua paxam painya auratsi abe painya neexanaexae. Yawano pia painya bapoxonae Nacom wucaetsi xua painya nepaca cayabara juntemainenexa painya abe exanae coyenewan. <sup>5</sup> Paxam ainya unthuton paxename. Yawano jopa paichipaem xua icha juntu coyene painya tsita xeinaewa Nacom. Daxota paxam mataropeicha paexanaponame xua pocotsiwan abe. Daxota bexa Nacom paca yabara anaepanaena xuano atene paca exanaena painya tsita natsicuentsixae po mataqueitha Nacom paebina xua bewa atene exanaeinchi pomonae barapo peabe coyenewan exana. Nacom yabara paebina jiwi xua penatsicuentsiwa xua abe peexanaexae xua yatsicaewa pexainyei coyenewatha abe peexanaexae bapontha. <sup>6</sup> Nacom catsibina pentoman daxita carepaya jiwitha xua pocotsiwan pia petanacuichiwiwaetsi. Pomonae abeya tanacuita xuya abeya matoma catsi-



bebinchi. Pomonaе wуnaeya tanacuita xuya wуnaeya matoma catsibebinchi. <sup>7</sup> Ichamonaе Nacom peajuntуapusu coyenewa catsibina pomonaetha pomonaе jopa aitaconaeya exana dubenanaebiyaeyo pocotsiwa Nacom ichichipa. Barapomonaе ichichipa nawita xua po coyene Nacom petsita xanepanaewa tsainchi. Matautano barapomonaе ichichipa nawita pia pebaru cui itura jinaewa Nacomtha. Matautano barapomonaе ichichipa nawita xua pia xeinaetsi peajuntуapusu coyenewa po peajuntуapusu coyenewa ataya tsiteca. <sup>8</sup> Ichamonaetha, Nacom anaya exanaena xua atene exanatsi barapomonaе pomonaе saya и piawa nata exana. Yawa Nacom atene exanaena pomonaе jopa jume cowuntsiyo Nacom pia pexainyei jume diwesi. Barapomonaе Nacom bichocono caseba itapeta peichichipaewaxae xua abe coyenewa pexanaewa. <sup>9</sup> Atene exanebinchi yawa ajunturewe exanebinchi daxita pomonaе abe coyenewan peexanaewi, matha copiya pomonaе judiomonaе, bapoxonaе iru catsibinchi pomonaе jopa judiomonaе naexanaeyo. <sup>10</sup> Ichitha nama Nacom seicaya catsibina pomonaetha pomonaе xanepanaya betiya peexanaewi po coyenewa xua Nacom petsita xanepanaewa tsainchi. Yawano catsibina po coyenewa xua pebaru cui itura jinae coyenewa. Yawano catsibina po coyenewa xua juntema pejinompae coyenewan. Matha copiya catsibinchi judiomonaе, bapoxonaе iru catsibinchi pomonaе jopa judiomonaе naexanaeyo.

<sup>11</sup> Barapomonaethabe Nacom catsina barapo coyenein tsipei Nacom tsita najupatsi daxita jiwi. <sup>12</sup> Pomonaе jopa judiomonaе naexanaeyo daxita barapomonaе yaputane poxonaе abe exana pia peitorobi coyenewan pexinaexae. Icha barapomonaе awiya eexanapona pocotsiwa xua abe, Nacom tsita natsicuentatsi. Barapomonaе werapaena abe peexanaexae bequein jopa yaputaeyo

Moisés pia peitorobi coyenewa tatsi. Pomonae judiomonae barapomonae yaputane Moisés pia peitorobi coyenewa tatsi. Daxota yaputane poxonae abe exana. Poxonae barapomonae abe eexanapona Nacom tsita natsicuenta exanatsi abe peexanaexae, poxoru yaputane Moisés pia peitorobi coyene tatsi. <sup>13</sup> Pomonae jume tane Moisés pia peitorobi coyenewa tatsi xuano exana pocotsiwa itoroba, barapomonae Nacom tsita jüntu coyene xanepanatsi. Pomonae saya jume tane Moisés pia peitorobi coyene tatsi daichitha jopa exanaeyo pocotsiwa itoroba, barapomonae Nacom jopa tsita jüntu coyene xanepanaetsi. <sup>14</sup> Pomonae jopa judiomonae naexanaeyo barapomonae jopa xeinaeyo Moisés pia peitorobi coyenewa tatsi. Ichitha ichacuitha barapomonae exana xua be pocotsi coyene Moisés pia peitorobi coyenewatha itoroba. Baxua barapomonae exana, tsipei pejüntu coyenewantha yaputane pocotsiwa xua abe xuano pocotsiwa xua xanepana bequein bara jopa xeinaeyo Moisés pia peitorobi coyenewa tatsi. Poxonae baxuan exana be barompaya pia peitorobi coyenewan xeina pia jüntu coyenewantha. <sup>15</sup> Poxonae barapomonae beta exana, baxua itapeinya xeina xua barapomonae pia jüntu coyenewantha xeina Nacom pia peitorobi coyenewa tatsi. Barapomonae yacuiya naexana. Barapomonae pia jüntu coyenein yaputane cana exanatsi xua poxonae wūnae exana xuano xua poxonae ichacuitha abe exana. <sup>16</sup> Jemeicha jopaena matacabi po mataqueitha poxonae Nacom itorobina xua Jesucristo yabara paebina daxita jiwi xua pia penatsicuentsiwa xua abe peexanaexae Nacomtha. Barapo mataqueitha Jesucristo yabara paebina jiwi xua penatsicuentsiwa xua abe peexanaexae xua pocotsiwan namicha abeya peexanaexae matautano pocotsiwan namicha abeya penanta xeinaexae. Baraxua

Jesucristo bara exanaena icha be pocotsi coyeneya pae-ban poxonae cueicueijan Nacom pia pexeinya peca-panenebiyae diwesi jume.

*Meje yabara xua judiomonaе yawa Moisés pia peitorobi coyenewa tatsi*

<sup>17</sup>Paxam papaebame, pajam: “Paxan seicaya judiomonaе aepiwi pan”, pajam. Pananta xeiname xua Moisés pia peitorobi coyenewa tatsi paca capanepaena. Atsaquiya papaebame xua barompaya painya nacom, yatsicaya pepa Nacom. <sup>18</sup>Barichi paxam papaebame xua pinae paya-putaneme pocotsiwa xua Nacom pia peichichipae coyenewa. Matautano papaebame xua pinae Moisés pia peitorobi coyenewa paca cuiduba xua painya neitapetsiwa po coyene xua pexainyei coyenewa. <sup>19</sup>Matautano atsaquiya papaebame, pajam: “Paxan pacuiduban pomonaе jopa peyaputae jiwi Nacom. Yawa jume cowunta pacana exanan pomonaе jopa jume cowuntsiyo Nacom”, pajam. <sup>20</sup>Paxam pananta xeiname xua paca itacpa xua pacuidubame pomonaе Nacom jopa peyaputae jiwi. Barichi pananta xeiname xua paca itacpa xua yaputane pacana exaname pomonaе pena rejume cowuntsiwi. Paca itacpa barapo ainya coyenewabe painya neyaputaexae Moisés pia peitorobi coyenewa xua xeina pexainyei yaputae coyenewan. <sup>21</sup>Poxonaе ichamonaе po coyenein yabara pacuidubame paxam jopa apara matha pajume yabara cowuntsiya exanaem barapo coyenein. Paxam pacuidubame pocotsi coyenewa xua jopa bewa caibi ichamonaetha xua iru painya barichiwathamdu. <sup>22</sup>Paxam pacuidubame xua jopa bewa ichun piowa tatsi tapichichi xua iru painya barichiwathamdu. Paxam papaebame xua pinae paaichaxaibim ibo nacomun, ichitha paxam pacaubame pocotsiwan xua jeba ibo nacomun pia botha tatsi. <sup>23</sup>Atsaquiya papaebame xua paxeiname

Moisés pia peitorobi coyenewa. Ichitha iru apara paxam jopa paexanaem xua painya nebaru cui itura jinaewa Nacom, poxonaem jopa payabara jume cui coyeneya exanaem barapo Moisés pia peitorobi coyenewa. Daxota ichamonae jopa Nacom baru cui itura jinaetsi. <sup>24</sup> Daxota Nacom Pejume Diwesitha jeye: “Apara paxam painya coutha pam poxonaem pomonae jopa judiomonae naexanaeyo Nacom abe yabara paebatsi tsipei copiya paxam abe paexaname”, jei Nacom Pejume Diwesitha.

<sup>25</sup> Paxam judiomonae pam, xua pebiwi pam paca wi thaba poxonaem cataunxuae pexui pam. Paca jumapa peru muxunene caxica xua ichaxota pebiwichi xeinatsi ichaxota pana nareixacaename. Baxua paca cana exana poxoru Moisés pia peitorobi coyene paca itoroba xua painya tsita itapeinya xeinaenexa xua bara apara Nacom piamonae tatsi pam. Barapo coyenewa xua Moisés pia peitorobi coyene tatsi paca yawena xua Nacom pajume cowanta dubenanaebiyame icha paexaname daxita pocotsiwa Moisés paca itoroba. Ichitha icha jopa paexanaem pocotsiwa xua Moisés paca itoroba jopa paca yawenaeyo xua Nacom pajume cowanta dubenanaebiyame bequein paca wi thabitha tsipae. <sup>26</sup> Pon jopa wi thabichi poxonaem bapon exana pocotsiwa Moisés pia peitorobi coyenewatha itoroba, Nacom tsitatsi be xua bapon bayatha apara wi thabatsi. Nacom tsitatsi xua bapon bara pijimonae jiton tatsi bequein bara jopa wi thabichi. <sup>27</sup> Ichacuitha pebiwi bequein jopa wi thabichi, daichitha exana pocotsiwa Moisés pia peitorobi coyenewatha itoroba. Barapomonae paca janta cui coyene yabara nanta xeinaena xua icha abe paexaname Nacomtha xuano xua icha wanae paexaname Nacomtha. Bequein payaputaetham Moisés pia peitorobi coyenewa xua petinaem diwesi, ichitha jopa payabara jume cuiya

exanaem pocotsiwa barapo Moisés pia peitorobi coyewewatha paeba. <sup>28</sup> Pon jiwi tsitatsi xua pepa judiomonaepin saya poxoru pewi thabixaetsi xua pepontha, bapon Nacom jopa tsitatsi xua pia jiton tatsi. <sup>29</sup> Jame xua pepa judiomonaepin penaexanaenexa tsane, saya jame poxonae Nacom jüntü coyene xanepana exana barapo jiton xua Nacom jopa bapon tsita natsicuentichi abe peexanaexae pia jüntü coyewewatha. Poxonae jiton xaniwaicha wi thabatsi, apara baxua, xua poxonae jiton xaniwaicha jume cowanta pejüntü coyewewatha Nacom. Pocotsiwa xua Moisés pia petinae coyewewa, jopa exanaeyo xua jiton icha jüntü coyene pexeinaewa Nacomtha xua pexanepanaewa. Saya apara meisa Nacom pia Pejumopectanaxü tatsi baxua exana. Jiwi wünaeya yabara paeba pomonae xua pewi thabiwichi. Ichitha nama Nacom wünaeya yabara paeba pontha pon icha jüntü coyene xeina bapontha xua pexanepanaewa.

### 3

<sup>1</sup> Metha beya ichün yainyabichipa jei tsipae: “¿Eta po coyene, po coyene Nacom tsita xanepanatsi, po coyene beta wepu toxeinchiya exana pomonae judiomonae xua wepu beta toxeincha exanatsi pomonae jopa judiomonae naexanaeyo? ¿Eta po coyene, po coyene Nacom tsita xanepanatsi, po coyene beta wepu toxeinchiya exana pon pewi thabinchi xua wepu beta toxeincha exanatsi pon jopa pewi thabinchi?” jei tsipae. <sup>2</sup> Metha jume notsipan bapon, jan tsipae: “Apara bara bichocono jopa juniya xanepanaeyo xua penaexanaewa judiomonae xuano xua wi thabatsi, poxoru copiya Nacom Pejume Diwesi nacana jume diwesi cata judiomonaetha”, jan tsipae. <sup>3</sup> Ichacuitha metha beya equeicha bapon yainyabichipa jei tsipae; “Daichitha ¿eta bichi tsipae icha barapomonae jiwana

nacui barapentsipa xua jopa peyabara jume cowuntsiwa xua Nacom bexa exanaena pocotsiwa Nacom yabara tsiwūnae muxu duta? ¿Daxota metha Nacom xuya nacui baraxubichipa xua jopa equeicha peexanaewa pia peyabara tsiwūnae muxu dutsiwa?” jei tsipae. <sup>4</sup>Metha jan tsipae: “¿Jume, apara Nacom bapana jopa baxua exanae! Apara jame Nacom daxitan pexainyeiwantha exaneiba. Nacom bewa exaneibina baxuan bara bequein jiwi pemuxuitorobi jiwi. David baxua yabara paeba Nacom Pejume Diwesitha xua Nacom tapaebatsi, jeye:

‘Nacom, poxonae cueicueijam jiwi yaputaena xua xam xainyeya bara nepaebin.

Bapoxonae jiwi jume amanayabame poxonae baxua exaname poxonae bequein jiwi cayabara paeba xua abe exaname’, jei David Nacom Pejume Diwesitha”, jan tsipae.

<sup>5</sup> Ichitha metha ichamonae jume coxonaya najume matsontsonobichipa jei tsipae: “Poxonae waxainchi abe exanatsi bapoxonae Nacom naca atene exana. Abe waexanae coyenewantha jiwi tsita itapeinya xeinatsi xua bara Nacom aichaxaibi abe peexanae coyenewa xua bara Nacom xanepanaya peexanaein. Daxota abe waexanae coyenewatha Nacom yawenatsi. ¿Eta xua metha yabara paebinchi baxua? ¿Metha Nacom jopa xaniwaicha exanaeyo icha naca atene exana abe peexanae cuiru coyene waexanaexae?” jei tsipae barapomona, xua saya paeba icha jiwi ichi pomona jopa peyaputae jiwi. <sup>6</sup>Metha barapomona jume notsipan, jan tsipae: “¿Jume apara, baxua jopa xainyeyo! Icha Nacom jopa xaniwaichiya exanaetsipae poxonae naca yabara paeba xua penatsicuentisiwa bapoxona jopa itacupaetsipaetsi xua daxita yabara paebatsi jiwi xua penatsicuentisiwa xua abe peexanae cuiru coyene peexanaexae. Ichitha Nacom apara xaniwaichiya

exana daxota itacupatsi xua daxita jiwi yabara paebatsi penatsicuentisiwa”, jan tsipae.

<sup>7</sup> Metha ichamonae jei tsipae: “Nacom jopa bewa naca yabara paebi penatsicuentisiwa tsane wanaca yabara paebinexa xua abe waexanaewan poxonae naerabiya cueicueijeichi. Poxoru poxonae naerabiya cueicueijeichi ichamonae tsita itapeinya xeinatsi xua Nacom seicaya exana xua Nacom bichocono xainyeya pepaebin xuano xua Nacom bara peainya cuin”, jei tsipae barapomonaе.

<sup>8</sup> Ichamonae iru jei tsipae: “Daxota waxainchi bewa abe exanaeinchi, xua watsita itapeinya xeinaenexa xua Nacom bara xainyeya pepaebin”, jei tsipae barapomonaе. Barapomonaе naerabiya paeба xua pinae xan barapo coyene cuiduban ichamonae. Barapo naerabiya pepaebiwi xua neyabara jume caenaeraba, barapomonaе Nacom tsita natsicuentinchi abe taneyabara paebixae.

*Meje yabara xua daxitatsi pomonaetsi pomonaе Nacom watsita natsicuentisiwichi abe waexanaexae bapontha*

<sup>9</sup> ¿Waxainchi pomonaе judiomonaetsi Nacom tsitatsi xua jopa wanatsicuentisi jiwichi xua beyacaincha pomonaе jopa judiomonaе naexanaeyo xua naca toxeinchiya bichocono abe peexanaewi? Jume. Tsipei bayathaunxuae paeban: “Waxainchi judiomonaetsi iru pomonaе jopa judiomonaе naexanaeyo daxitatsi abe waexanae jiwichi”, jan. <sup>10</sup> Nacom Pejume Diwesitha baxua yabara jeye:

“¡Dapomonaе ajibi pomonaе xua xanepanaya peexanaewi, xua matautano bara caeinno!

<sup>11</sup> Matautano dapon ajibi pon ichichipa xua peyabara yaputaewa pexainyei coyenewa. Matautano dapon ajibi pon xua ichichipa penaponaewa Nacomtha.

<sup>12</sup> Daxita jiwi Nacom pentatsi yawano abe peexanae jiwi bichocono.

¡Dapon ajibi pon xua xanepanaya beta exana, xua matautano bara caeinno!

<sup>13</sup> Barapomonaе caunuta nawita pocotsiwa peabe jumein, icha muthu tsina ichi xua cawenabeina xua tuxamna baxoyareca pebocarecaexae pon tupa. Bapomonaе pepaebiwantha ichamonaе muxujainyabeibatsi.

Barapo pepaebiwantha ichamonaе ajuntucoyenetane exanatsi, icha jomo ichi xua ichan sinatsi poxonaе bichocono atene exanatsi pewano tsapa pexeinaexae.

<sup>14</sup> Barapomonaе saya u cueicueijei xua xuan peabe jumein, po jumein xua atsaca pepaebiwa.

<sup>15</sup> Barapomonaе bichocono ichichipa nawita xua ichamonaе bichocono atene peexanaewatsi xuano xua pejutebiwatsi.

<sup>16</sup> Daxita ichaxota poneiba barapomonaе, ichamonaе abe exaneibatsi.

Matautano exaneiba pocotsiwa ichamonaе ajuntucoyenetane cana exanatsi.

<sup>17</sup> Barapomonaе jopa yaputaeyo xua po coyene caemonaе nantiya juntema jinompa penaexanaе coyenewa.

<sup>18</sup> Matautano barapomonaе jopa cunuwiyo Nacom xua abe peexanaeyainwatsi”, jei Nacom Pejume Diwesitha.

<sup>19</sup> Waxainchi yaputainchi xua daxita Nacom paeba Moisés pia peitorobi coyenewatha baraxua judiomonaе nexa. Barapomonaе bewa exanaе Moisés pia peitorobi coyenewa tatsi. Ichitha judiomonaе jopa itacupaetsi xua peexanaewa barapo coyenewa. Barichi pomonaе jopa judiomonaе naexanaeyo jopa itacupaetsi xua peexanaewa baxua. Barapo coyeneya Nacom yaputane



exana xua daxita jiwi jopa pepaebinexa xua pinae jopa abe peexanaewa barapo jiwi. Matautano Nacom tsita itapeinya xeina jiwitha xua Nacom yabara paebina xua penatsicuentisiwa daxita jiwi xua abe peexanaexae bapontha. <sup>20</sup> Dapon ajibi pon itacupatsi xua pejeiwa: “Xan bichocono tajuntũ coyene xanepanaein xua Nacom jopa tatsita natsicuentisixae abe taexanaexae bapontha. Tsipei daxita yabara jume cuiya exanan pocotsiwa Moisés pia peitorobi coyenewatha itoroba”, xua pejeiwa. Tsipei jame apara barapo Moisés pia peitorobi coyenewa tatsi naca yaputane exana xua waxainchi apara abe waexanae jiwichi.

*Meje yabara xua jiwi capanenebiyatsi pejume cowuntsixae Nacom*

<sup>21</sup> Ichitha anoxuae Nacom jiwi yaputane exanatsi po coyeneya bapon exana xua poxonae jiwi juntũ coyene xanepana exanatsi bapontha. Nacom jopa tsita natsicuentichi barapomonae xua abe peexanaexae. Nacom baxua exana jopa poxoruyo xua peexanaexae pocotsiwa Moisés pia peitorobi coyenewatha itoroba. Moisés pia peitorobi coyenewa tatsi, irũ Nacom pia peitorobi jume pepaebiwi paeba xua bewa jiwi Nacom tsita juntũ coyene xanepanaetsi. <sup>22</sup> Nacom juntũ coyene xanepana cana exana jiwi poxonae barapo jiwi jume cowunta Jesucristo. Nacom bara daxita najuntũ coyene jupiya exana pomonaetha pomonae pejume cowuntsiwi Jesucristo, poxoru Nacom tsita najupatsi barapo pejume cowuntsiwichi. <sup>23</sup> Tsita najupatsi yaitama daxita jiwi peabe coyenewan exana. Yawano barapo jiwi taseicatsi po coyene xua Nacom tsita xanepanatsi barapomonae. <sup>24</sup> Ichitha Nacom peantobexae jopa tsita penatsicuentisiwatsi barapo jiwi. Baxua Nacom amanaya taexana. Nacom pentoma exana xua jiwi pejuntũ coyene xanepanaenexa poxonae Cristo

Jesús naetotha tsitupa, xua jiwi tsitupatsi. <sup>25</sup> Nacom Pexanto itorobica, pon Cristo. Bapon jana pichapabarena poxonae tsitupa jiwi pia peabe coyenewan tatsi. Nacom jüntemaina jiwi pia peabe coyenewan poxonae barapomonae jume cowunta Cristo. Barapo coyenewatha Nacom yaputane exana xua bara jüntu coyene xanepana cana exana jiwi xua jopa Nacom petsita natsicuentisiwatsi xua abe peexanaexae. Bayatha bapon beitatemaya cui taetaepona jiwi abe pia peexanae cuiru coyenewan tatsi pomonae xua caena bayatha jinompa poxonae cataunxuae Jesús jopa tupaeyo. <sup>26</sup> Ichitha anoxuae Nacom yaputane exana jiwitha xua beta xanepanaya peexanaewa. Anoxuae Nacom jopa beitatemaya cui taeyo jiwi abe pia peexanae cuiru coyenewan tatsi. Apra jame Nacom jüntu coyene xanepana cana exana jiwi poxonae Nacom yabara jüntemaina jiwi xua pia penatsicuentisiwa xua abe peexanaexae. Baxua exana daxita pomonaetha pomonae pejume cowuntsiwi Jesús.

<sup>27</sup> Daxota waxainchi jopa naca itacupaeyo xua atsaquiya nayabara paebatsi xua beta waexanaewa. Waxainchi jopa najüntu coyene xanepana exanaetsi bequein ichichipatsi xua waexanaewa pocotsiwa Moisés pia peitorobi coyenewatha itoroba, daichitha jopa exanaetsi. Nama apra wajume cowuntsixae Jesús, daxota bapon naca jüntu coyene xanepana cana exana Nacomtha. <sup>28</sup> Nama anoxuae waxainchi yaputainchi xua Nacom jüntu coyene xanepana cana exana pontha pon jume cowunta Jesús. Nacom jopa jüntu coyene xanepana exanaeyo poxonae bequein ichun ichichipa xua peexanaewa pocotsiwa Moisés pia peitorobi coyenewatha itoroba xua daichitha poxonae jopa exanaeyo.

<sup>29</sup> Nacom jopa meisa apra judiomonae pia Nacom tatsi. Apra iru pomonae jopa judiomonae naexanaeyo barapomonae iru pia Nacom tatsi. <sup>30</sup> Icha Nacom ajibi, saya

meisa bapon Nacom nacata bara compa. Barapo Nacom jüntü coyene xanepana cana exana jiwi, pomonaetha pomonae jume cowanta Jesucristo, bequein pomonae wi thabatsi xuano bequein pomonae jopa wi thabichi. <sup>31</sup>Waxainchi jopa nacui barapentichi Moisés pia peitorobi coyenewa tatsi yaitama jume cowantatsi Jesús. Jame poxonae xaniwaicha jume cowantatsi Jesús bapoxonae bara xaniwaicha exantsi pocotsiwa Moisés pia peitorobi coyenewatha itoroba.

## 4

### *Meje xua Abraham yabara*

<sup>1</sup> Anoxuae paca tsipaebatsi xua pocotsiwa Nacom exana Abrahamtha. Bapon wamo susatopin, irürü daxita judiomonae pia pamo susatopin tatsi pon caena bayatha tupa. <sup>2</sup> Abraham jopa pia coya najüntü coyene xanepana exanaeyo xua jopa Nacom petsita natsicuentisiwatsi xua abe peexanaexae. Daxota jopa itacupaetsi xua atsaquiya nayabara paeba xua xanepanaya peexanaewa. Bapon jopa itacupaetsi xua atsaquiya paeba Nacom peitütha tatsi. <sup>3</sup> Nacom Pejume Diwesitha Abraham yabara pae-batsi, jeye: “Abraham jume cowanta Nacom. Peyabara jume cowantsixae pocotsiwa xua Nacom exanapaeba, Nacom jüntü coyene xanepana cana exana bapon”, jei Nacom Pejume Diwesitha. <sup>4</sup> Poxonae jiton ba tanacuita ichün, jopa jiton pentoma becatsichi xua saya amanaya nexa poxoru ichün peyabara nanta xeinaexae bapon. Jame jiton ba bewa pentoma catsichi xua poxoru penacuichixae. <sup>5</sup> Ichitha nama Nacom seicayiya exana. Pon yabara jume cowanta pocotsiwa Nacom exanapaeba xua Nacom peyabara jüntemainenexa xua bapon pia penatsicuentisiwa tatsi, bara Nacom yawena bapon. Barapo jiton Nacom tsita jüntü coyene xanepanatsi, bequein

bapon jopa exanaeyo pocotsiwa bewa bapon exanae xua daxota Nacom peyawenaenexa tsane. <sup>6</sup> David pon wamo susatopin, pon caena bayatha tupa, bapon caena bayatha Israel nacuapiwi itorobiya pia pepa peewatsinchi. Bapon David yabara paeba po jiton bichocono juntu coyene weiweina. Jeye: “Pon peyabara jume cowuntsixae pocotsiwa Nacom exanapaeba, Nacom juntu coyene xanepana cana exana. Jopa apara Nacom juntu coyene xanepana exanaeyo xua poxoru bapon wanaeya xanepanaya peexanaexae. Apara poxoru Nacom peichichipaexae, daxota baxua exana”, jei David. <sup>7</sup> Equeicha David jei:

“Juntu coyene weiweina pomonae Nacom yabara juntemaina xua puxana exana abe pia peexanae cuiru coyenewan tatsi.

<sup>8</sup> Juntu coyene weiweina pon Nacom jopa tsita natsicuentaichi xua abe peexanaexae”, jei David.

<sup>9</sup> Po pejuntu coyene weiweinaewa xua David yabara paeba, meisa saya u pomonae pewi thabiwichi jopa nexiyo. Apara barapo pejuntu coyene weiweinaewa iru pomonae jopa pewi thabiwichi nexano apara. Bayathaunxuae paca tsipaebatsi xua Abraham yabara jume cowunta pocotsiwa Nacom exanapaeba, daxota Nacom juntu coyene xanepana cana exana bapon xua jopa Nacom tsitatsi xua Abraham penatsicuentaichi xua abe peexanaexae. <sup>10</sup> Abraham jopa juntu coyene xanepana exanaetsi poxonae nacana cui wetatsi xua pewi thabiwatsi. Apara Nacom Abraham juntu coyene xanepana exanatsi poxonae cataunxuae jopa wi thabichi. <sup>11</sup> Abraham peyabara jume cowuntsixae pocotsiwa Nacom exanapaeba, Nacom juntu coyene xanepana exana. Cotacaya bapoxonae Abraham wi thabatsi. Barapo pewi thabi coyene tsita itapeinya xeina xua bara Nacom juntu coyene

xanepana exana Abraham, peyabara jume cowuntsixae pocotsiwa Nacom exanapaeba. Abraham petsiwana exanaexae xua pewi thabiwatsi, daxota Nacom tsitatsi xua Abraham be coxiyũn poxonaē cana exanatsi xua canamataxeinaena xua daxita nacuanpiwi pomonaē jopa pewi thabiwichi. Barapomonaē be Abraham pia pexui. Baxua Nacom cana exana po jiwitha, po jiwi peyabara jume cowuntsiwixaetsi pocotsiwa exanapaeba bara bequein daxita barapo jiwi jopa pewi thabiwichi copiya. Daxota Nacom irũ yabara nanta xeina xua bara irũ barapomonaē jũntũ coyene xanepana bapontha. <sup>12</sup> Barichi Abraham be coxiyũn cana exanatsi, xua pomonaē bayatha pewi thabiwichi barapomonaē be pia pecanamataxeinaeinchi. Jopa Abraham be coxiyũn cana exanaetsi xua poxoru barapomonaē pewi thabixaetsi. Jame apara be coxiyũn cana exanatsi poxoru irũ peyabara jume cowuntsiya jinnompaexae pocotsiwa Nacom exanapaeba icha Abraham ichi, pon wamo susatopin xua beya poxonaē wi thabatsi.

*Meje yabara xua poxonaē Nacom cata pia peyabara tsiwũnaē* muxu dutsiwa, Abraham catatsi

<sup>13</sup> Nacom yabara tsiwũnaē muxu duta Abrahamtha irũ pia pemomoxi susato jiwitha tatsi. Nacom yabara tsiwũnaē muxu duta xua catsina daxita barapo cae pin nacue Abrahamtha, irũ pia pemomoxi susato jiwitha tatsi. Daxita barapomonaetha Nacom jopa apara catsiyo barapo yabara petsiwũnaē muxu dutsiwa xua poxoru Abraham peexanaexae pocotsiwa Moisés pia peitorobi coyenewatha itoroba tsipei Moisés jopa cataunxuae naexanaeyo poxonaē bayatha Abraham tũpa. Apara Nacom cata barapo yabara petsiwũnaē muxu dutsiwa poxoru Abraham peyabara jume cowuntsixae pocotsiwa Nacom exanapaeba. Daxota Nacom yabara tsitatsi xua bara Abraham pejũntũ coyene xanepanaein bapontha. <sup>14</sup> Icha

pomonaē xeinaetsipa pocotsiwa Nacom yabara tsiwūnae muxu duta, icha barapomonaē apara barapomonaē tsipae pomonaē exana daxita pocotsiwa Moisés pia peitorobi coyenewatha itoroba bapoxonaē barapomonaē jopa nantawenonaetsipae xua yabara jume cowūnta pocotsiwa Nacom exanapaeba. Matautano pocotsiwa xua Nacom yabara tsiwūnae muxu duta barapomonaē jopa tsita xainyei tsipaetsi. <sup>15</sup> Ichitha baraxua jopa xainyeyo, tsipei Moisés pia peitorobi coyenewa saya exana xua jiwi atene peexanaewatsi. Atene exanatsi poxoru jiwi beta jopa daxita yabara jume cuiya exanaeyo barapo Moisés pia peitorobi coyenewa tatsi. Ichitha pomonaē jopa xeinaeyo Moisés pia peitorobi coyenewa, barapomonaē Nacom jopa tsita penatsicuentsiwatsi xua abe peexanaexae xua poxonaē jopa exanaeyo barapo peitorobi coyenewa.

<sup>16</sup> Daxota Nacom yabara tsiwūnae muxu duta Abrahamtha peyabara jume cowūntsixaetsi pocotsiwa Nacom exanapaeba. Nacom pia yabara petsiwūnae muxu dutsiwa, Nacom bara xaniwaicha amanaya catsina Abraham pia pemomoxi susato jiwitha tatsi. Nacom jopa meisa catsiyo pomonaetha pomonaē peexanaewi xua Moisés itoroba. Apara Nacom irū cata pomonaetha pomonaē pejume cowūntsiwichi icha Abraham ichi poxonaē jume cowūnta Nacom. Bapon Abraham be coxiyūn cana exainchi xua daxita waxainchi be xua wanacanamataxeinaein, copiya pejume cowūntsixae. <sup>17</sup> Nacom jeye Abrahamtha pejume diwesitha: “Xam cacana exanatsi xua ainya nacuanpiwi necayabara nanta xeinaenexa xua xam compam daxita nacuanpiwi cacanamata caexanatsi be coxiyūm”, jei Nacom Pejume Diwesitha. Daxota barapo yabara petsiwūnae muxu dutsiwa Nacom tsita coyene xanepanatsi. Barapon Nacom Abraham yabara jume cowūnta pocotsiwa Nacom exanapaeba. Matautano

barapo Nacom equeicha asu exana pomonae bayatha werapa. Matautano barapon Nacom itoroba xua forota pocotsiwan jiwi bapana jopa tae copiya, poxoru Nacom cataunxuae abu jopa forotsiyo bapocotsiwan.

<sup>18</sup> Abraham poxonae nawei wetaba xua jopa itacupaetsi xua pexeinaewa pexui, awiya cataunxuae yabara jume cowuntsiya wunaewata pocotsiwa Nacom exanapaeba. Bapon jume cowuntsiya popona xua Nacom exanaena xua bayatha paeba xua Abraham pinae bapon pexanto xeinaena. Abraham yabara jume cowunta pocotsiwa Nacom exanapaeba pocotsiwa yabara tsiwunaewata muxu duta. Bapon Abraham cana exanatsi xua daxita carepaya nacuan jiwi peyabara nanta xeinaenexa xua Abraham compa daxita nacuanpiwi canamata exanatsi be coxiyan. Caena bayatha Nacom tsipaeba Abraham. Nacom jeye: “Abraham, exanaein ayei jiwi jinya nemomoxi susato jiwi”, jei Nacom. <sup>19</sup> Abraham jopa juntu coyene natsep- aeyo xua peyabara jume cowuntsiwa pocotsiwa Nacom exanapaeba, bequein bara bapon cien po weibe xeina. Bapon Abraham yaputane, xua bapon iru piowa tatsi Sara bara imoxoyo methaunxuae tupaenabe. Abraham piseuribe bichocono perunbe. Matautano yaputaneno xua Sara jopa itacupaetsi xua pexui pexeinaewa. <sup>20</sup> Bapon Abraham jopa ainya muxu xeinaeyo. Matautano jopa nacui baraxubiyo xua peyabara jume cowuntsiwa pocotsiwa Nacom exanapaeba xua pocotsiwa Nacom yabara tsiwunaewata muxu duta xua pinae Abraham pexanto xeinaena. Jame bapon Abraham beta xaniwaicha jume cocowuntapona. Abraham wunaewata jaintapona Nacom. <sup>21</sup> Baxua Abraham exanapona poxoru bara yatsicaewa yaputane xua Nacom itacupatsi xua peexanaewa pocotsiwa xua bapon yabara tsiwunaewata muxu duta. <sup>22</sup> Abraham peyabara jume cowuntsixae pocotsiwa Nacom exanapaeba, dax-

ota bapon Nacom tsitatsi xua bapon bara peyabara jũntũ coyene tsita xanepanaeinchi xua jopa petsita natsicuentisixaetsi abe peexanaexae bapontha.

<sup>23</sup> Po jumein xua bayatha Abraham yabara paebatsi xua jeye: “Nacom tsitatsi xua bapon bara pejũntũ coyene xanepanaein xua jopa petsita natsicuentisixaetsi abe peexanaexae bapontha”, jei, barapo jumein jopa meisa tinaeyo xua bapon nexa. <sup>24</sup> Barapo jumein xua po jumein tina apara irũ bara waxainchi nexa xua naca yabara paebartũ. Wajume cowũntisixae Nacom, daxota Nacom tsitatsi xua bara waxainchi irũ wajũntũ coyene xanepanae jiwichi xua jopa watsita natsicuentisiwatsi xua abe waexanaexae bapontha. Waxainchi yabara jume cowũntatsi pocotsiwa Nacom exanapaeba, pon Jesús asũ exanatsi petũpae cuiru coyene weya, pon Wanacanamataxeinaein. <sup>25</sup> Nacom itoroba xua bapon Jesús naca tsitũpa abe waexana cuiru coyenewan. Mataũtano Nacom asũ exanano, xua Jesús asũ petũpae cuiru coyene weya xua wanaca cana exanaenexa xua jopa Nacom watsita natsicuentisiwa tsane xua abe waexanaexae bapontha.

## 5

*Meje yabara xua Nacom wanaca cana exanaewa xua jopa wanatsicuentisiwa tsane bapontha, xua abe waexanaexae*

<sup>1</sup> Nacom naca cana exana xua bapon jopa watsita natsicuentisiwa tsane abe waexanaexae bapontha. Baxua Nacom naca cana exana wayabara jume cowũntisixae pocotsiwa Nacom exanapaeba. Daxota waxainchi jũntema dubenanaebiyatsi Nacom peitũtha tatsi Jesucristo wanaca tsitũpaexae, pon Wanacanamataxeinaeinxae. <sup>2</sup> Cristo wajume cowũntisixae, daxota naca cana exana xua Nacom bara wanaca yawenaewa tsane wanaca antobexae. Nacom wanaca yawenaexae ajũntũcoyenesũya jinompatsi. Yawa



waxainchi jũntũ coyene weiweinatsi wawũnae ewatsixae xua bexa irũ xeinaeinchi pebarũ cui itura jinaewa po pebarũ cui itura jinaewa jiwi Nacom tsita xeinatsi peainya cuinxae icha bapon ichi. <sup>3</sup> Jopa meisa baxua nexiyo, jame yawa jũntũ coyene weiweineibatsi poxonae ichamonae naca atene exaneiba. Tsipei waxainchi yaputainchi xua wanaca jũntũ coyene ayarusũ exanaewa xua daxota jopa waaitaconaewa poxonae bequein ichamonae naca atene exana. <sup>4</sup> Poxonae ajũntũcoyenyarusũya jinompatsi xua daxota jopa waaitaconaewa poxonae bequein ichamonae naca atene exana, bapoxonae Nacom naca weyatane xua bara beta waexanaewa. Poxonae Nacom naca weyatane, baxua naca cana exana xua wawũnae ewatsiya ewatsi-watsi xua Nacom nacata exanaena pocotsiwa yabara naca tsiwũnae muxu duta. <sup>5</sup> Barapo wawũnae ewatsiwa jopa naca jũntũ coyene cana exanaeyo xua wajũntũ coyene we-coyeiwa xua jopa wataxae pocotsiwa wawũnae ewatsiwa. Nacom bichocono naca jũntũ coyene yũca cana exana pia peantobe coyenewa pia Pejumope tũnaxũtha. Barapo pia Pejumope tũnaxũ tatsi naca nacana jumope cata wajũntũ coyenewatha.

<sup>6</sup> Poxonae waxainchi jopa naca itacũpaeyo xua wacoutha wanacapanenebiwa, bapoxonae Cristo naca tsitũpa abe waexanae cuiru coyenewan nexa. Bapon Cristo tũpa poxonae po mataqueitha Nacom copata xua bapon petũpaewa tsaneba. <sup>7</sup> Barapo cae pin nacuathe nacata ayapube xua nanta xeinatsi xua jiton wayabara nanta xeinaewa xua ichũn peita araranaewatsi xua peyapu cabocaewa xua daxota petũpaewa bequein barapo ichũn daxita yabara jume cuiya exana pocotsiwa Moisés pia peitorobi coyenewatha paeba. Tsipei jiwi ba anatsiũntabe, jopa ichipaeyo xua petũpaewa. Ichitha ichacuiha tsipae metha jiton yaita araranaetsipa

xua peyapu cabocaewa xua daxota petupaewa pon xanepanaya petaexanaein ichamonaē. <sup>8</sup> Jame Nacom xaniwaicha naca tsita itapeinya xeina pia wanaca antobexae. Baxua Nacom naca cana exana poxonaē Cristo naca yapu caboca xua wanaca tsitupaewa bara bequein cataunxuae abe waexanaē jiwichi. <sup>9</sup> Nacom naca exana xua waxainchi pejuntũ coyene xanepanaē jiwichi xua poxonaē jopa natsicuentaſichi bapontha abe waexanaexae, xua poxonaē Cristo naca tsitupa. Bapoxonaē yawa jana pichapabarena. Barichi icha coyenewano exanaenano. Cristo naca yaputane exana xua wanaca capanenebiwa tsane Nacom pia pewanaca casebiwa weya. Po mataqueitha Nacom yabara paebina daxita jiwi xua penatsicuentaſiwa xua abe peexanaexae, barapo mataqueitha Nacomtha jopa natsicuentaſi tsainchi xua abe waexanaexae. <sup>10</sup> Copiyatha waxainchi Nacom pia peitafaetabi jiwichi. Ichitha bapon Nacom naca cana exana xua waita coxonaewa xua daxota Nacom pia jiwi tatsi wanaexanaenexa, Pexanto tatsi pewanaca tsitupaexae. Ichitha anoxuae Nacom pia jiwi tatsixaetsi, Jesucristo naca capanenebiya pia peasũ poponaē coyenewatha. <sup>11</sup> Jopa meisa baxuiyo, jame juntũ coyene weiweinatsino Nacomtha xua xuan Jesucristo peexanaexae waxainchi nexa, pon Wanacanamataxeinaein. Bapon Cristo naca cana exana xua waxainchi Nacom wanaca ita coxonaewa xua daxota Nacom pia jiwi tatsi wanaca cana exanaewa.

*Meje xua Adán yabara irũ* Cristo yabara

<sup>12</sup> Caein pon xua copiya abe exana barapo cae pin nacuathe, bapon Adán. Bapon caena bayatha tupa copiya abe peexanaexae. Bapoxonaē daxita jiwi abe eexanapona barapo cae pin nacuathe. Jiwi abe peexanaponaexae daxota werapaena, tsipei daxita jiwi abe exana. <sup>13</sup> Barapo

cae pin nacuathe jiwi abe eexanapona beya poxonae Moisés pia peitorobi coyene tatsi xeina barapo cae pin nacuathepiwi. Poxonae jiwi cataunxuae jopa yaputaeyo Moisés pia peitorobi coyenewa tatsi, jopa Nacom tsi-tatsi xua barapomonae pexeinaewa penatsicuentisi coyenewa bapontha bequein barapomonae abe exanaetha. <sup>14</sup> Ichitha po dapaetha poxonae Adán popona weya xua beya poxonae iru Moisés popona, jiwi abe eexanapona. Daxota jiwi xeinapona po coyenewatha xua daxota werapaena barapo jiwi. Barapomonae werapa bequein pia peabe coyenewan tatsi jopa barichiyo icha Adán ichi. Adán abe exana poxonae bequein Nacom itoroba xua jopa bewa pinae xae tsane petheito. Bapon Adán bara be bapon pon bexa patopeicapaeba, bapon Cristo. Adán pia coutha xua jiwi abe peexanaewa xua jiwi pecanamata caexanaexaetsi. Seicaya nama Cristo pia coutha xua jiwi beta peexanaewa xua jiwi pecanamata caexanaexaetsi.

<sup>15</sup> Pocotsi coyene xua Adán naca tsiexana jopa be ichiyo xua pocotsi coyene naca tsiexana Jesucristo. Jiwi nawita werapa poxoru caein abe pecanamata exanaexae bapon Adán. Ichitha Nacom amanaya naca tsiexana pecapanenebiyae coyenewa poxoru caein, pon Jesucristo, naca tsitupa abe waexanaexae. Barapo coyene xua po coyene Nacom naca tsiexana bichocono peainya cui coyene, beyacaincha po cui coyene Adán naca tsiexana. Barapo coyene Nacom naca tsiexana xua peantobexae daxita jiwi peyawenaenexa ayei jiwitha. <sup>16</sup> Po peabe coyenewa caein canamata exana bapon Adán jopa coyene jupaetsi xua nacui coyene jupa exanabe po cui coyene xua Nacom amanaya naca tsiexana. Copiya Adán canamata exana abe peexanae cuiru coyene. Bapoxonae daxita jiwi jupa exana. Nacom yabara paeba Adán xua penatsicuentisiwa abe peexanaexae. Daxota Nacom Adán

yabara jeichichi xua Adán bewa pinae tupaena abe peexanaexae. Barichi Nacom tane xua daxita jiwi bewa werapaena bichocono abe peexanaexae. Daxota Nacom ichichipa xua jiwi peyawenaewatsi. Nacom amanaya juntu coyene xanepana exana jiwi xua barapo jiwi jopa natsicuentisiyo bapontha, abe peexanaexae. Baxua exana Cristo petsitupaexae jiwi. <sup>17</sup> Bara xaniwaicha caein abe pecanamata exanaexae, daxita jiwi bewa werapaena abe peexanaexae. Ichitha nama anoxuae pocotsiwa caein peexanaexae pon Jesucristo, barapocotsiwa bichocono ayapusu beyacaincha xua Adán exana. Jesucristo petsitupaexae jiwi daxota Nacom bichocono jopa juniya yawenaeyo jiwi peantobexae. Barapo jiwi Nacom amanaya juntu coyene xanepana exana. Daxota Nacom weyatane xua barapomonae jopa xeinaeyo penatsicuentisi coyenewa bapontha bequein barapomonae abe exana taetha. Barapomonae Jesucristo ayapusya nanabarü yawa pona penanabarü yawa itorobinexa tsane ichamonaetha.

<sup>18</sup> Barapon Adán pia peabe coyenewaxae, daxita jiwi natsicuenta Nacomtha xuya abe peexanaexae icha Adán ichi. Po pexanepanae coyenexae xua Jesucristo exana, barapo coyene jiwi cana exanatsi xua capanenebiyatsi penatsicuentisi coyenewa weya xua abe peexanaexae. Daxota daxita jiwi pomonae pejume cowuntsixae Jesucristo itacupatsi xua ataya asu jinompaena. <sup>19</sup> Baxua caunutan xua caein jopa pejume jejeixae xua peexanaewa pocotsiwa xua Nacom itoroba, daxota jiwi ayei jiwi abe eexanapona. Barichi xua caein pejejeixae xua peexanaewa pocotsiwa Nacom itoroba, daxota ayei jiwi nantu coyene xanepana exanapona Nacomtha. Matauta barapomonae Nacom capanenebiya exana xua pia penatsicuentisi coyenewa weya, xua abe peexanaexae.

<sup>20</sup> Nacom itoroba, xua Moisés tina pia peitorobi coye-

newa xua jiwi peyaputaewa tsane xua bara jiwi daxita abe peexanaponae jiwi poxonae jopa yabara jume cuiya exanaeyo pocotsiwa Moisés itoroba. Poxonae jiwi equeicha mataropeicha yaputane Moisés pia peitorobi coyenewa, bapoxonae equeicha bichocono mataropeicha yaputane abe peexanae coyenewan. Daichitha Nacom bichocono mataropeicha aantobe tsoponae xua peyawenaenexatsi barapomonae. <sup>21</sup> Copiya daxita jiwi werapa abe peexanaexae. Ichitha anoxuae Nacom peantobexae jiwi daxota cana exana xua jopa xeinaeyo penatsicuenti coyenewa xua abe peexanaexae. Nacom jiwi catatsi peajuntuyapusu coyenewa po peajuntuyapusuwa ataya tsiteca Jesucristo pon Wanacanamataxeinaein wanaca tsitupaexae.

## 6

*Meje yabara xua waxainchi asu* jinompatsi caemonae wanaexanaexae Cristotha

<sup>1</sup> Waxainchi jopa bewa abe eexanaponaeinchi xua Nacom wanaca yayawenaponaenexa xua daxota wayaputaenexa xua bara Nacom naca antobe. <sup>2</sup> Jopa bewa baxua exanaetsi. Waxainchi bayatha wetatsi xua abe waexanaewa. Equeicha jopa bewa abe exanaetsi, icha be pon petupaein ichi, xua jopa itacupaetsi xua equeicha abe peexanaewa, tsipei bayatha tupa. <sup>3</sup> Paxam payaputaneme baxue: Poxonae waxainchi ichamonae naca bautisaba, bapoxonae caemonae nanaexainchi Cristo Jesustha. Waxainchi caemonae wananaexanaexae Cristotha poxonae naca bautisaba, bapoxonae be cae cui coyeneya nanaexanatsi xua wawerapaewa, icha bapon ichi poxonae tupa. Baxua be icha waxainchi xua bayatha werapatsi xua daxota equeicha jopa naca itacupaeyo xua abe waexanaewa. <sup>4</sup> Wanaca bautisabi coyenewa baxua be poxonae Cristo naca cayawa muthuthu xotsi. Yawano be Cristo naca

cayawa tupa poxonaē bapon tupa. Icha Cristo ichichi xua equeicha asu exanatsi petupaē cuiru coyene weya, Nacom bara naca ichi tsane. Nacom Cristo paxa asu cana exanatsi pia peitupanaē coicha ayapusu itorobi coyenewatha. Barichi Nacom bara naca ichi tsane wayawa jinompaenexa pena juntu coyenewa. Bapoxonaē xeinatsi pena juntu coyenewa, xua po juntu coyenewatha jinompatsi icha Cristo ichi. Nacom, baxua Cristo paxa cana exanatsi Nacom pia peitupanaē coicha ayapusu itorobi coyenewatha.

<sup>5</sup> Tsipei waxainchi be caemonae nanaexanaeinchi po petupaē coyenewatha poxonaē bapon tupa. Barichi tsane poxonaē equeicha asu naca exanaena petupaē cuiru coyene weya icha matha Cristo ichichi poxonaē asu exainchi petupaē cuiru coyene weya. Bapoxonaē caemonae nanaexanaeinchi Cristotha. Daxota icha Cristo ichichi xua poxonaē asu exainchi equeicha petupaē cuiru coyene weya, naca barichi tsane. Nacom equeicha asu naca exanaena petupaē cuiru coyene weya caemonae wananaexanaeatsi Cristotha poxonaē be naca yawa tupa Cristo. <sup>6</sup> Waxainchi yaputainchi, xua pocotsiwan exanatsi xua xuan waperu juntu coyenein po coyenein naca cana exana xua abe waexanaewa, barapo coyenein be weraweraca poxonaē Cristo tupa exanadutatsi naetha. Baxua nacata exana xua jopa equeicha bichocono waichichipaewa tsane xua waexanaewa abe coyenewa poxonaē bequein wajuntu coyene naca itoroba xua abe waexanaewa tsane. <sup>7</sup> Daxota ba pon xua bayatha tupa jopa itacupaetsi xua equeicha abe peexanaewa. Waxainchi barichichi jopa naca itacupaeyo xua equeicha abe waexanaewa tsane. <sup>8</sup> Waxainchi Cristo naca cayawa tupa, daxota jume cowuntatsi xua bexa bapon Cristo baru jinompainchi. <sup>9</sup> Waxainchi yaputainchi, xua poxonaē

Cristo equeicha asu exanatsi petupaе cuiru coyene weya, bapoxonae bapana equeicha jopa tupa exanae tsainchi. <sup>10</sup> Poxonae Cristo tupa bapon saya bara cae coyenewatha tupa xua daxita jivi nexa abe peexanaexae xua ataya tsiteca. Ichitha xua Cristo anoxuae asu popona, barapo pepoponae coyenewa xua beta peexanaenexa pocotsiwa Nacom peichichipaewa xua bara ataya tsane. <sup>11</sup> Barichi anoxuae paxam bewa pananta xeinaename be pomonae xua werapa xua equeicha jopa itacupaetsi xua abe peexanaewa. Bara paichinde paexande xua jopa paexanaeinde icha barapomonae ichi. Paexande pocotsiwa Nacom tsita xanepanatsi xua pocotsiwa Nacom ichichipa xua caemonae painya nenaexanaexae Cristo Jesustha.

<sup>12</sup> Daxota jopa pacopatsinde xua painya juntu coyenein paca itoroba xua abe painya neexanaewa. Painya pepon werapaena daxota jopa paexanaem tsane xua pocotsiwa painya pepon paca itoroba xua pocotsiwa ichichipa paexaname xua peabe coyenewan. <sup>13</sup> Painya xoba pacopatame xua bara painya juntu coyenein paca itorobina xua painya neexanaewa tsane peabe coyenewan. Jame maisa bara pacopare xua bara Nacom paca juntu coyene itorobeibina painya neexanaenexa pocotsiwa Nacom paca itoroba. Bara paichinde icha be ichi xua pomonae bayatha werapa xua equeicha asu exanatsi xua jopa equeicha abe exanaeyo. <sup>14</sup> Anoxuae barapo abe peexanae coyenewa po coyene xua copiya paexanaponame jopa itacupaetsi xua paca cana exana xua equeicha abe painya neexanaponaewa tsane. Barichi anoxuae equeicha jopa panantawenonaem xua paexanaename pocotsiwa Moisés paca itoroba pia peitorobi coyenewatha Nacom painya paca capanenebiyaenexa. Jame paexana dubenanaebiyama pocotsiwa xua Nacom ichichipa pia paca necayawenae coyenewatha, pia paca necaantobexae.

*Meje yabara xua waxainchi bewa exanaetsi pocotsiwa pexainyei coyenewa*

<sup>15</sup> ¡Waxainchi jopa bewa abe eexanaponaeinchi! Anoxuae jopa Moisés naca itorobiyo pia peitorobi coyenewatha xua waexanaewa. Apra Nacom naca itoroba wanaca yawenaenexa xua wanaca antobexae. <sup>16</sup> Paxam payaputaneme icha pebin nacaenaeta xua ichichipa exana pocotsiwa xua ichun itoroba, bapoxonae bapon naexana be pon xua amanaya petanacuichin pon pia pentacaponaeinchi nexa. Daxota poxonae paxam paichichipame xua itapeta painya neexanaewa peabe coyenewan, bapoxonae barapo peabe coyenewa be paca canamataxeina. Bapoxonae be pana nacana exaname be pocotsin amanaya petanacuichin pia pentacaponaein nexa. Daxota pawerapeneme, painya neexanaexae barapo abe peexanae coyenewa. Ichacuitha icha paichichipame xua itapeta painya neexanaewa pocotsiwa xua Nacom itoroba, bapoxonae xaniwaichiya painompame. Nacom tsitatsi xua painya juntu coyenein xanepana xua jopa painya nenatsicuentisiwa abe painya exanaexae bapontha. <sup>17</sup> Ichitha baxua yabara Nacom tsipaeban, janje: “Nacom maisa juntu coyene weiweinan, barapo Roma tomarapiwi pia peexanaexae. Tsipei copiya ɱ saya xua abe coyenewan peexanaewi. Ichitha anoxuae barapomonae cajume cowunta. Barapomonae bichocono jume cowunta pia juntu coyenewatha pocotsiwa pexainyei jume xua barapomonae nacuiduba”, janje Nacomtha. <sup>18</sup> Daxota anoxuae Nacom paca capanenebiya exana barapo abe painya neexanae coyenewan weya. Yawano paxam amanaya painya netanacuichi jiwi pam Nacom nexa xua beta painya neexanaewam. <sup>19</sup> Xan cueicueijan pocotsi jumeintha xua jiwi itacupatsi peyaputaenexa, tsipei yaputan xua pacata ayapube xua painya neyaputaewa. Caena bayatha paxam



saya payabara copatame xua bara painya neexanaewa peabe coyenewan xua paichichipame. Jamaisa anoxuae payabara copare xua painya pepon peexanaponaenexa pocotsiwa xua pexanepanae coyenewan Nacom nexa. Bapoxonae Nacom patsita juntu coyene xanepanaya jinnompame.

<sup>20</sup> Poxonae cataunxuae saya ɳ painya neexanaewi abe peexanae coyenewan, bapoxonae jopa ɳ painya neexanae jiwi pocotsiwa pexanepanae coyenewan. <sup>21</sup> Poxonae bayatha peabe coyenewan paexaname baraxua apara jopa paca yawenaeyo. Apara saya paca aura exana anoxuae. Ichitha barapo abe peexanae coyenewan saya paca cana exana xua painya newerapaewa tsane. <sup>22</sup> Ichitha anoxuae panenebiya painya nepaca exanaexae barapo abe painya neexanae coyenewan weya, daxota anoxuae paexaname pocotsiwa xua Nacom paca itoroba. Daxota pocotsiwa Nacom painya nepaca matomatsiwa, baxua apara poxonae Nacom paca juntu coyene xanepana cana exana bapontha. Matautano Nacom paca catsibina pocotsiwa peajuntucoyenesuwa po peajuntucoyenesuwa ataya tsiteca. <sup>23</sup> Barapo peabe coyenewaxae saya jiwi werapaena cana exanaeinchi. Ichitha pocotsiwa xua Nacom amanaya wanaca catsiwa, baxua apara po coyene xua peajuntuayapusu coyene po peajuntuayapusu coyene ataya tsiteca. Barapo peajuntuayapusu coyenewa naca cana exana xua caemonae naexainchi Cristo Jesustha, pon Wanacanamataxeinaein.

## 7

*Meje yabara xua po peitorobi coyenewa poxonae jitha peecaewa yabuyo*

<sup>1</sup> Tamonae pam, pomonae pam pomonae iru painya nejume cowuntsi jiwixae Jesucristotha. Paxam barapomonae pam xua payaputaneme Moisés pia peitorobi coyenewa tatsi. Yawano payaputaneme xua jiwi

saya bewa exanaena pocotsiwa Moisés itoroba barapo peitorobi coyenewatha poxonaē cataunxuae jinompa barapo cae pin nacuathe. Ichitha poxonaē jiwī werapa barapomonae jopa equeicha bewa exanaē pocotsiwa barapo peitorobi coyenewa itoroba. <sup>2</sup> Paca tsipaebatsi peyabara jūta paebiwa: Petsiriwa powa xeina piseuri bewa piseuritha cuicuinae pepaebixae barapo peitorobi coyenewa, xua poxonaē pia pebin tatsi awiya asu popona. Ichitha icha barapowa pia pebin tatsi tatupatsi barapowa jopa nantawenonaeyo xua peexanaewa pocotsiwa Moisés itoroba barapo peitorobi coyenewatha xua po coyene pebin yabara paebatsi. <sup>3</sup> Daxota icha barapowa isa maiteca icha pebin xua nasi cui exana icha pebintha poxonaē cataunxuae baru popona pia pebin, bapowa bapoxonaē Nacom tsita natsicuentatsi xua abe peexanaexae. Ichitha icha bapowa pia pebin tatsi tatupatsi barapowa itacupatsi xua pepichiwa icha pebin. Barapowa jopa Nacom tsita natsicuentatsichi xua abe peexanaexae. Poxonaē baxua exana, tsipei barapo peitorobi coyenewa jopa yabara paebiyo baxua.

<sup>4</sup> Tamonaē pam, paxam pomonaē iru painya nejume cowantsiwixae Jesucristo. Barichi bara jūta ichi poxonaē Cristo tupa, paxam iru be pawerapame. Daxota jopa panantawenonaem xua paexanaename pocotsiwa Moisés itoroba pia peitorobi coyenewatha. Anoxuae paxename ichun pon paca itoroba. Baraxua barichi icha yabuyo ichi xua pita icha pebin pon bapowa itorobatsi poxonaē piseuri tatsi tatupatsi. Anoxuae paxam Cristo piamonaē tatsi pam, pon equeicha asu exanatsi petupae cuiru coyene weya. Barapo coyenewatha Nacom naca cana exana xua wanaca itacupaewa xua waexanaewa tsane pocotsiwa xanepana Nacom nexa. <sup>5</sup> Poxonaē waxainchi copiya jume cowantatsi, Moisés yabara naca itoroba pia

peitorobi coyenewatha po coyenewa jopa bewa exanaetsi. Ichitha wajuntũ coyenewatha ichichipatsi nawita xua waexanaewa barapo abe peexanae coyenewan poxonae jume tainchi xua jopa bewa exanaetsi barapo coyene. Barapo coyene naca cana exana xua saya wawerapaewa tsane. <sup>6</sup> Ichitha anoxuae jopa wanantawenonaewa xua waexanaewa pocotsiwa Moisés itoroba pia peitorobi coyenewatha. Waxainchi bayatha be werapatsi xua daxota barapo Moisés pia peitorobi coyene tatsi jopa itacũpaetsi xua wanaca itorobiwa. Daxota anoxuae naca itacũpa xua watanacuichiwa Nacom. Waxainchi xeinatsi pena jũntũbũ coyene po pena jũntũ coyene Nacom pia Pejumope tũnaxũ tatsi naca cata. Nama jopa equeicha exanaetsi pocotsiwa Moisés itoroba barapo pia peru itorobi coyenewatha xua bayatha tina.

*Meje yabara xua Pablo jeye: “Meje xua po peabe exanae coyene xeinan”, jei.*

<sup>7</sup> Waxainchi jopa bewa paebichi xua Moisés pia peitorobi coyenewa tatsi abe. Tsipei barapo Moisés pia peitorobi coyenewa tatsi necuiduba xua bara abe exanan. Copiya jopa yaputaeinyo xua peabe coyenewa poxonae yabara uwiya ichichipan pocotsiwan ichamonae xeina. Ichitha barapo peitorobi coyenewa naca tsi-paeba, naca jeye: “Jopa yabara uwiya paichichipaeinde pocotsiwa xua ichamonae xeina”, jei barapo peitorobi coyenewa. <sup>8</sup> Poxonae copiya jume cowuntan, Moisés yabara neitoroba pia peitorobi coyenewatha po coyenewan xua jopa bewa uwiya ichichipaein tsane ichamonae piawan. Ichitha jame ichichipan nawita tajuntũ coyenewatha xua taxeinaewa tsane xua ichamonae piawan poxonae jume tan xua jopa bewa ichichipaein tsane xua taxeinaewa tsane ichamonae piawan. Poxonae awiya jopa yaputaeinyo Moisés pia peitorobi coyenewa jopa

ichipaeinyo xua taxeinaewa pocotsiwa ichamonae piawan. <sup>9</sup>Caena bayatha poxonae jopa yaputaeinyo Moisés pia peitorobi coyenewa xan saya jüntema poponan, tsipei jopa yabara yaputaeinyo xua abe taexanaewa. Ichitha pirapae bequein yabara yaputan barapo peitorobi coyenewa, xua ichamonae piawan peuwiwa yabara, awiya bichocono abe exanaponan. Bapoxonae bara be tatupae coyenewaba tsipei jopa jüntema tapoponaewa abe taexanaexae. <sup>10</sup>Barapo Moisés pia peitorobi coyenewa tatsi Nacom cata xua jiwi pejünta coyene weiweiñaenexa xua poxonae pejünta coyene xanepanaewa tsane. Poxonae jiwi jume cowuntsiya exana daxita xua barapo coyenewatha itoroba, barapo jiwi bexa tsane xeinaena peajüntayapuswa xua bara ataya tsane xeinaena. Daichitha barapo coyenewa wecoyei necana exana tsipei bewa tatupae coyenewa tsane poxoru jopa neitacupaeyo xua exanan daxita xua barapo coyenewa itoroba. <sup>11</sup>Barapo Moisés peitorobi coyenewa be netsita penaerabi coyenewa. Mexeya itara xeinacuaein jantocuae peajüntayapuswa poxonae exanaein pocotsiwa Moisés itoroba pia peitorobi coyenewatha. Daichitha poxonae abe exanan Moisés pia peitorobi coyenewa netsita itata xua bewa tupaen tanatsicuentiswaxae abe taexanaexae Nacomtha.

<sup>12</sup>Daxita po peitorobi coyenewan Nacom cata Moises-tha daxita bara wñae, yawa bara pexainyei coyenewan.

<sup>13</sup>Barapo Moisés pia peitorobi coyenewa jopa necana exanaeyo xua bewa tupaen tanatsicuentiswaxae abe taexanaexae Nacomtha. Apara jame barapo abe taexanae coyene necana exana xua be tupaen tanatsicuentiswaxae abe taexanaexae Nacomtha. Bequein barapo Moisés pia peitorobi coyene tatsi wñae, daichitha barapo peitorobi coyene neyaputane exana xua abe taexanaein. Barapo peitorobi coyenewatha xua Nacom naca yaputane exana

xua poxonae abe exanatsi barapo abe peexanae coyenewa bara xainyei, bara abe bichocono. Jopa bichocono juniya abeyo.

<sup>14</sup> Yaputainchi xua Moisés pia peitorobi coyenewa tatsi apara xanepana, Nacom weya pejume pichipaexae. Ichitha poxoru saya jiton jüntü coyeneya taxinaeinxae tajüntü coyene necana exana xua abe taexanaewa. <sup>15</sup> Tsipei jopa xapain yaputaeinyo pocotsiwa xua exanan, poxoru jopa exanaeinyo pocotsiwa xua xanepana xua pocotsiwa ichichipan xua taexanaewa nexa. Ichitha pocotsiwa aichaxaibin xua jopa pexanepanaexae, dai-chitha apara baxua exaneiban. <sup>16</sup> Ichitha icha abe exanan xua bequein aichaxaibin abe taexanaewa, bapoxonae yaputan xua Moisés pia peitorobi coyenewa tatsi xanepana. Tsipei barapo peitorobi coyenewa necuiduba xua jopa bewa exanae abe peexanae coyenewan. <sup>17</sup> Tacoutha jopa ichipaeinyo xua abe taexanaewa bequein baxua exanan. Ichitha barapo abe peexanae coyenewa xua tajüntü coyenewatha xeinan, barapo coyene necana exana xua apara abe taexanaewa. <sup>18</sup> Tsipei xan yaputan xua xeinan jiton pia coyene. Daxota jopa xeinaeinyo pexanepanae coyenewa. Bequein ichichipan xua xanepanaya taexanaewa, ichitha jopa neitacupaeyo xua baxua exanan tacoutha. <sup>19</sup> Jopa exanaeinyo po pexanepanae coyenewa bequein ichichipaethan xua taexanaewa. Ichitha ı exanaponan po abe peexanae coyenewan bequein aichaxaibithan xua taexanaewa. <sup>20</sup> Daxota icha abe exanan pocotsiwa bequein aichaxaibithan xua abe taexanaewa, bapoxonae jopa neitacupaeyo xua tacoutha nayawenan xua jopa abe taexanaewa. Barapo abe peexanae coyenewa xua tajüntü coyenewatha xeinan, barapo coyene necana exana xua queicha mataropeicha abe taexanaewa.

<sup>21</sup> Daxota nayaputan pocotsiwa exaneiban tajüntü

coyenewatha, xua poxonae bequein ichichipan beta taexanaewa tsane bapoxonae abe exaneiban. <sup>22</sup> Bichocono ichichipeiban tajüntu coyenetha Nacom Pejume Diwesi tatsi. <sup>23</sup> Ichitha yaputan xua po peabe coyenewa tajüntu coyenewatha xeinan neitoroba xua abe taexanaewa tsaibi, bequein nanta xeinan xua beta taexanaewa, icha Nacom ichichipa. Ichitha barapo peabe coyenewa neitoroba xua equeicha mataropeichiya abe taexanaewa, po peabe coyenewa xua tajüntu coyenewatha xeinan. Xan be pon tanebusi cui taetaein ichamonae tsipei barapo abe taexanaewa neitorobeiba xua abe taexanaewa.

<sup>24</sup> ¡Ooo, jopa taxanepanae tsocuaeinyo! ¡Jopa tajüntu coyene wñae tsocuaeinyo! ¿Jintam metha necapanepaena barapo tapepon weya po pepon xua bewa tupaena? <sup>25</sup> Daxota Nacomtha janje: “Nacom jüntu coyene weiweinan xua Jesucristo, pon Tanecanamataxeinaein, itacupatsi xua tanecapanepaewa tsane barapo tapepon weya”, jan Nacomtha. Daxota yaputan xua nanta xeinan xua bara beta taexanaewa pocotsiwa Nacom neitoroba, ichitha tajüntu coyenewatha exanan pocotsiwa xua abe taexanaewa.

## 8

*Meje yabara xua peajüntuyarusüya pejinompaewa po peajüntuyarusüwa Nacom pia Pejumope tñaxu tatsi naca cata*

<sup>1</sup> Dapon ajibi pon itacupatsi peyabara paebiwa xua pomona caemonae penaexanaewi Cristo Jesustha natsicuenta abe peexanaexae Nacomtha. <sup>2</sup> Nacom pia Pejumope tñaxu tatsi naca cata peajüntuyarusüwa xua wajinompae coyenewanexa xua caemonae xua wanaexanaetsi Cristo Jesustha. Barapo Nacom pia Pejumope tñaxu tatsi neyawena pia peayarusü itorobi coyenewatha. Necapanepa exana po peitorobi coyene weya

xua neitoroba xua abe taexanaewa. Matautano necapanepa exana xua po peitorobi coyene weya tupa necana exana. <sup>3</sup> Moisés pia peitorobi coyenewa tatsi jopa itacupaetsi xua jiwi capanenebiya exainchi abe pia peexanae cuiru coyenein weya. Jiwi jopa itacupaetsi xua daxita yabara jume cuiya exana barapo Moisés pia peitorobi coyenewa tatsi. Ichitha Nacom Pexanto itorobica pon yatsicaya pepa Pexanto tatsi. Barapo Pexanto tatsi naexana be bara jiton pia pepon tatsi, bara naca peru coyene jupa, po pepontsi xua abe waexanae jiwichi. Poxonae Cristo tsitupa waabe exanae cuiru coyenewan, bapon amanayaba barapo waabe exanae cuiru coyenewantha. Barapo peabe coyenewan jopa peitacupaenexa tsainchi xua wanaca cana exanaewa tsane xua equeicha abe waexanaewa tsane. <sup>4</sup> Nacom baxua exana xua waxainchi wanaca itacupaenexa xua waexanaewanexa tsane pocotsiwa Moisés itoroba pia peitorobi coyenewatha. Waxainchi naca itacupa xua waexanaewa pocotsiwa Moisés pia peitorobi coyenewatha itoroba, poxoru jopa apra exanaetsi xua wapepon peichichipaexae. Apra jame exainchi xua pocotsiwa Nacom pia Pejumope tunaxu tatsi wanaca itorobixae.

<sup>5</sup> Pomonae exana dubenanaebiya pocotsiwa pia pepon ichichipa exana, saya barapomonae yabara nanta xeina xua abe peexanae coyenewa. Pomonae exana dubenanaebiya icha pocotsiwa Nacom pia Pejumope tunaxu tatsi ichichipa, barapomonae saya yabara nanta xeina xua xanepanaya peexanae coyenewa pocotsiwa Nacom nexa. <sup>6</sup> Jiwi ba yabara nanta xeina abe peexanae cuiru coyenewan pocotsiwa pia pepon tatsi ichichipa. Bapoxonae barapo jiwi werapaena peexanaexae barapo abe peexanae coyene. Iru icha jiwi ba yabara nanta xeina xanepanaya peexanae coyenewan xua pocotsiwan Nacom pia Pejumope tunaxu tatsi ichichipa, barapomonae

xeinaena peajüntuyapusuwa po peajüntuyapusuwa xua bara ataya tsane. Matautano xeinaena jüntema pejinompae coyenewa. <sup>7</sup> Pomonae saya peyabara nanta xeinaewi xua abe peexanae coyenewa xua pocotsiwa pia pepon tatsi ichichipa exana, barapomonae apara Nacom pia peaitafaetabi jiwichi. Barapomonae jopa ichipaeyo xua peexanaewa pocotsiwa Nacom itoroba pia peitorobi coyenewatha xuano xua jopa itacupaetsi xua peexanaewa barapo coyene. <sup>8</sup> Pomonae naitomatsiya exana pocotsiwa xua pia pepon tatsi itoroba xua abe peexanae coyenewa peexanaewa, barapomonae Nacom jopa tsita xanepanaetsi.

<sup>9</sup> Ichitha nama paxam jopa paexanaem baxua po abe peexanae cuiru coyenewan painya pepon paca cana exana xua abe painya neexanaewa. Ichitha nama paxam pajinompame icha be pocotsi coyeneya Nacom pia Pejumope tñaxu tatsi ichichipa, icha barapo jumope yatsicaewa paca baru jinompa. Pon jopa Nacom pia Pejumope tñaxu tatsi baru poponaetsi, bapon jopa Cristo pijimonae tatsi. <sup>10</sup> Ichitha icha Cristo paca baru popona, Nacom pia Pejumope tñaxu tatsi paca cana exana xua jopa painya nenatsicuentsiwam xua abe painya neexanaexae Nacomtha. Baxua paca cana exana bara bequein painya pepon werapa exanatsi abe peexanae coyenewan. Baxua paca cana exana painya nejutu coyene xanepanaexae Nacomtha. <sup>11</sup> Nacom pia Pejumope tñaxu tatsi Jesús asu exanatsi petupaе cuiru coyene weya. Icha Nacom pia Pejumope tñaxu tatsi paca baru popona, bapoxonae Nacom asu exanaena painya pepon, po pepon xua werapaena. Baxua Nacom pacata exanaena, icha Nacom pia Pejumope tñaxu tatsi ichi poxonae Cristo asu exanatsi petupaе cuiru coyene weya. Baxua Nacom exanaena painya nepaca baru jinompaexae Nacom pia Pejumope tñaxu tatsi.



<sup>12</sup> Tamonae pam, paxam pomonae iru painya nejume cowuntsiwixae Jesucristo. Waxainchi jopa bewa exanaetsi pocotsiwan xua wapepon naca cana exana xua abe waexanaewa tsane. <sup>13</sup> Tsipei icha paxam paexana dubenanaebiyame xua pocotsiwa painya pepon ichichipa xua abe painya neexanaewa tsane, bapoxonae pawera-paename. Ichitha jame paexana dubenanaebiyama pocotsiwa Nacom pia Pejumope tunaxu tatsi paca cui itoroba xua painya neexanaewa tsane. Bapoxonae jopa paexanaem pocotsiwan xua painya pepon paca cana exana xua abe painya neexanaewa tsane. Bapoxonae bexa tsane ajuntusuya pajinompaename Nacom pia nacuatheicha.

<sup>14</sup> Daxita pomonae Nacom pia Pejumope tunaxu tatsi itorobiya ewata, barapomonae bara Nacom pia pexui tatsi. <sup>15</sup> Nacom paca nacana jumope cata. Barapo pejumope jopa paca cana exanaeyo pomonae be painya nepaca busi cui tatayebeibi jiwi pam xua ichamonae amanaya painya netanacuichi jiwi pam, xua daxota eque-icha pajunuwame. Jame barapo Nacom pia Pejumope tunaxu tatsi paca cana exana xua Nacom pia pexui tatsi pam. Barapo Nacom pia Pejumope tunaxu tatsi naca exana xua barompaya wajeiwa: “Axa”, wajeiwa Nacomtha. <sup>16</sup> Nacom pia Pejumope tunaxu tatsi iru wajuntu coyenewa natsipaebabe xua pinae bara Nacom pia pexui tatsi wanaexanaewichiba. <sup>17</sup> Waxainchi Nacom pia pexui tatsi wanaexanaexae, daxota xeinatsi pocotsiwa Nacom wanaca juntana jebiwa xua bexa tsane naca catsibina. Barapocotsiwa bayatha yabara naca tsiwunae muxu duba. Poxonae Nacom baxua naca catsibina, Cristo matha catsinchi xua waxainchi wajiwana xeinaenexa. Icha waxainchi ichamonae naca atene exana, icha poxonae Cristo ichichi xua matha atene exanatsi ichamonae, bapoxonae waxainchi Cristo baru xeinaeinchi pocotsiwa Nacom wanaca juntana jebiwa. Nacom naca catsibebina

po pexeinya peitupanae coicha xua bayatha Cristo catatsi.

*Meje yabara xua Nacom piamonaetha catsicaena pia pexeinya peitupanae coicha*

<sup>18</sup> Xan yaputan xua bequein ichamonae naca atene exana barapo cae pin nacuathe, baxua jopa ainya cuiyo. Matautano yaputan xua Nacom cata pia pexeinya peitupanae coicha Jesustha. Barichi naca catsibina barapo pexeinya peitupanae coicha po pexeinya peitupanae coicha xua jopa juniya wunaeyo. <sup>19</sup> Daxita po jiwi Nacom forota barapo cae pin nacuathe, barapo jiwi wunae weyataeya ewata po mataqueitha poxonae Nacom tsita itutsina piamonae. Nacom tsita itutsina piamonae xua daxita jiwi peyaputaenexa tsane xua xaniwaicha barapomonae apara Nacom pia pexui. <sup>20</sup> Daxita baxuan xua xuan Nacom exana po cae pin nacuathe barapo coyenein abe naexanaena. Jopa apara barapo coyenein pia couthiyo xua peweraweracaewa tsane peabexae, saya apara poxoru Nacom baxua pecopatsixae poxoru Nacom namchi xua daxita bewa weraweracaena Adán abe peexanaexae. Ichitha Nacom yabara cana juntu coyene weta exana xua pejopaewa tsane matakabi po mataqueitha xua barapo cae pin nacue pena nacua naexanaena.

<sup>21</sup> Barapo cae pin nacuathe xua pena nacua, jiwi jopa bapana equeicha werapae tsane. Matautano daxita coyenein xua Nacom forota jopa bapana equeicha weraweracae tsane. Barapo mataqueitha daxita xua xuan Nacom forota Nacom wunae cana exanaena, icha pijimonae aetha cana ichi tsane xua pijimonae tatsi bichocono wunaeya xanepana naexanaena. <sup>22</sup> Waxainchi yaputainchi daxita baxuan xua pejinompaewan xua Nacom peforotsiwan caena bayatha atene xua beya anoxuae. Atene icha yabuyo ichi xua bichocono atene poxonae imoxoyo pexuyo tanaexanatsi. <sup>23</sup> Daxita baxuan meisa jopa ateneyo.

Bara iru waxainchi daxitatsi atenetsi bequein Nacom pia Pejumope t̄naxu tatsi naca yawa jinompa. Barapo pejumope, apara pocotsiwa xua copiya matha Nacom naca cata xua pocotsiwa jiwana Nacom bexa naca catsibina. Bi-chocono aj̄ntu coyenerewetsi xua j̄nthuthu wecoyeichi, poxona waxainchi ewatatsi po mataqueitha poxona Nacom yatsicaewa naca cana exanaena pia pexuichi, xua barichino naca catsibinano pena pepon. <sup>24</sup> Poxona Nacom naca capanenebiya, Nacom naca tsipaeba pinae naca catsibina pena pepon. Barapo pepon cataunxuae ab̄u w̄nae ewatatsi. Icha waxainchi xeinaeinchi pocotsiwa xua w̄nae ewatatsi bapoxona jopa nantawenonaetsi xua came w̄nae ewatatsi, tsipei bayatha xeinaeinchiba. Poxoru jiton ba jopa came w̄nae ewatsiyo pocotsiwa xua bayatha xeinaba. <sup>25</sup> Ichitha icha w̄nae ewatatsi pocotsiwa xua came jopa xeinaetsi bapoxona bewa w̄nae ewatichi xua jopa bepijawa aitaconaetsi.

<sup>26</sup> Barichi Nacom pia Pejumope t̄naxu tatsi naca yawena tsipei waxainchi waj̄ntu coyene faefaenaewi. Waxainchi jopa yaputaetsi xua betiya cuitiya w̄catsi Nacom. Ichitha poxona j̄ntu coyene bojeichi, poxoru jopa wanaca itac̄paewa xua po jumetha wacaunutsiwa, bapoxona Nacom pia Pejumope t̄naxu tatsi nacata w̄ca Nacomtha. <sup>27</sup> Nacom, bapon yaputane pocotsiwa xua jiwi pia j̄ntu coyenewatha nanta xeina. Matautano barapon yaputane pocotsiwa Nacom pia Pejumope t̄naxu tatsi ichichipa paeba jiwi nexa. Nacom pia Pejumope t̄naxu tatsi Nacom w̄catsi icha be pocotsi coyeneya Nacom ichichipa pomona xua Nacom piamona tatsi nexa.

*Meje yabara xua waxainchi amanayabatsi po coyenein xua bequein naca atene exana*

<sup>28</sup> Waxainchi yaputainchi xua daxita po coyenein xua nacata exana bequein w̄nae, ichacuihtha bequein

abe, daichitha Nacom equeicha daxita baxuan nacata xanepana exana. Baxua Nacom taexana pomonaetha pomonae pia peantobexaetsi. Barapomonae Nacom waba petaexanaewa tsainchi pocotsiwa bapon ichichipa. <sup>29</sup> Caena bayatha poxonae aena nacua forota, Nacom tsiwana yaputane barapomonae pomonae pejume cowuntsiwichi tsainchi. Matautano Nacom itapeta xua pecana exanaenexa icha be pexanto tatsi ichi. Baxua Nacom exana xua Pexanto tatsi bapon Jesús, be matapin naexana xua daxita jiwi pentapin tatsi. <sup>30</sup> Pomonae xua Nacom itapeta xua caena bayatha xua copiya poxonae aena nacua forota, bara yawano Nacom waba xua peexanaenexa pia pexui tatsi. Pomonae Nacom pewabixae bara yawano exana xua barapomonae jopa penatsicuentsiwa xua abe peexanaexae pecatsixae pejuntũ coyene xanepanaewa bapontha. Pomonae xua Nacom pejuntũ coyene xanepana exanaexae, bara yawano yabara tsiwuna muxu duta xua barapomonae naexanaena icha be Nacom Pexanto tatsi ichi.

<sup>31</sup> Anoxuae waxainchi yaputainchi xua Nacom naca yawena daxota dapon ajibi pon naca jũntũ coyene amanayaba xua abe wanaca exanaenexa. <sup>32</sup> Poxoru Nacom Pexanto jopa asiwiyo daxota Nacom copata xua wanaca tsitũpaenexa. Daxita waxainchi yaputaeinchi xua daxota daxitan coyenein Nacom amanaya naca catsiba po coyenein canamatawenonatsi. <sup>33</sup> Dapon ajibi xua itacũpatsi yabara paeba xua pinae Nacom tsita natsicuentatsi pomonae pia peitapetsiwixae tatsi xua abe petsita exanaexaetsi. Nacom yabara paeba xua pinae apara jopa barapomonae tatsi natsicuentisichi xua abe petsita exanaexaetsi bequein abe exana taetha. <sup>34</sup> Matautano dapon ajibi xua itacũpatsi yabara paeba xua barapomonae bewa werapaena penatsicuentisixae xua abe peexanaexae

Nacomtha. Barapomonae jopa bewa werapae tsane, tsipei Cristo Jesús tsitupa barapomonae, abe peexanaexae Nacomtha. Bapon Cristo Jesús equeicha asu exanatsi. Anoxuae eca Nacom pia coxa weya tatsi. Bapon Cristo Jesús Paxatha wuca xua nacata wuca. <sup>35</sup> Cristo naca antobe, daxota dapon ajibi pon itacupatsi xua tsanayiya naca cana exana Cristo weya. Ichacuitha ichamonae atene wanaca exanaewichitha awiya Cristo naca antobe. Ichacuitha ichamonae daunwei wanacata exanaewichitha awiya naca antobe. Ichacuitha ichamonae abe wanacata exanaewichiwathatsi wayabara cueicueijeixae Jesús awiya bapon naca antobe. Ichacuitha wajainpaewichiwathatsi awiya naca antobe. Ichacuitha wanacata acoibichiwathatsi paparuwa awiya naca antobe. Ichacuitha wanapeipeichiwathatsi poxonae ichamonae abe nacata exana awiya naca antobe. Ichacuitha ichamonae wanaca jutebichiwathatsi awiya naca antobe. Daxita barapo coyenein jopa canaupatsi xua tsanayiya wanaca exanaewa Cristo weya. <sup>36</sup> Icha naca ichi daxita barapo coyenein, barichiru Nacom Pejume Diwesitha bayatha baxua yabara naca tsiwuna muxu duta, jeye:

“Nacom poxoru tapaca cajume cowantsi

jiwixaetsi daxita maticabin tsaibi  
ichamonae ichichipa pana jutebeiba.

Barapomonae pana necana exaneiba icha jiwi

ichi xua poxonae daxita maticabin ovejan  
capaneiba pon oveja pejutebeibin beya”,

jei Nacom Pejume Diwesitha, xua  
yabara naca tsiwuna muxu duta.

<sup>37</sup> Ichitha bequein waxainchi daxita barapo coyenein naca atene exana, daichitha amanayabatsi barapo coyenein Cristo pia peayapusu itorobi coyenewatha pon wanaca antobein. <sup>38-39</sup> Daxota bara yatsicaewa yaputan,

xua dapocotsi coyene ajibi po coyenetha xua tsanayiya naca exana Nacom pia peantobe coyene weya tatsi. Jopa tsanayiya naca exanaeyo bara bequein poxonae tupaethatsi, yawa bara bequein poxonae jinompaethatsi. Iru matatsunpiwi jopa canaupetsi xua tsanayiya wanaca cana exanaewa, bequein iru caurimonaeru, bequein iru pocotsiwan xua anoxuae exanaponaru, bequein iru xua pocotsiwan bexa tsaneru, bequein iru xua pocotsiwan wetsica patopaenano, bequein iru xua pocotsiwan ira wetsinano, bequein iru ichawano xua pocotsiwa Nacom forota. Bara bequein daxita barapo coyenein, ichitha jopa canaupetsi xua tsanayiya pewanaca exanaewa Nacom pia wanaca antobe coyene weya tatsi. Nacom naca cata barapo peantobewa xua Cristo Jesús xeina, pon Wanacanamataxeinaein.

## 9

### *Meje yabara xua Nacom itapeta judiomonae*

<sup>1</sup> Pocotsiwan paca tsipaebatsi barapocotsiwan pexainyei jumein. Tajume cowuntsixae Cristo, bara jopa naerabinyo. Tajuntu coyenetha Nacom pia Pejumope tanaxu tatsi neitoroba. Barapon jume daunweya netsipaeba xua pinae bara yatsicaewa xainyeya cueicueijan. <sup>2</sup> Xainyan, wecoyan. Bichocono tamonae siwa anthuthutanein tsaibi jopa pejume cowuntsixae Cristo. <sup>3</sup> Bichocono antobein barapomonae pomonae tanacuapiwi. Daxota nayabara paeban, janje: Bena bequein siwa tupaetaein tamonae xua bequein tsana tanaexanaewa Cristo weya, xua be poxonae Nacom tsita tanatsicuentsiwa xua barapomonae abe pia peexanae coyenewan nexa. Bapoxonae xua Nacom tamonae pia pecapanenebiyaenexatsi, daxota Nacom copata xua ichamonae nebexubina, najanje. <sup>4</sup> Pon

Israel, pon caena bayatha tupa, bapon nawun cata tamonaetha. Daxota tamonaē “israelmonae”, baraichi. Bapon pia pemomoxi susato jiwi tatsi pomonaē tamonaexae Nacom barapomonaē pia pexui exana. Barapomonaē bayatha Nacom yanta poƆona xua daxota barapomonaē tane Nacom pia pexeinya peitupanaē coicha poxonaē xua beta exana barapomonaē nexa, Nacom tsipaeba barapomonaē pocotsiwa xua bapon peichichipaewa. Matautano Nacom yabara tsiwunaē muxu duta pomonaetha pomonaē xua ataya yaweneibina barapomonaē peexanaenexa xua bapon ichichipa. Barapomonaetha Nacom cata Moisés pia peitorobi coyenewa tatsi. Matautano Nacom cata barapomonaē po coyene xua barapomonaē xaniwaicha wunaē pejainchinexa bapontha. Matautano Nacom yabara tsiwunaē muxu duta barapomonaē xua Cristo pepatopeicaewa tsane. <sup>5</sup>Barapomonaē wamo susato jiwi pia pemomoxi susato jiwi tatsi. Cristo be jiton coyeneya naexana barapomonaē jiwana pomonaē pia pemomoxi susatopiwi jiwana tatsi. Bapon Cristo apara bara Nacom. Barabun Nacom bara ataya wunaē jainteibinchi pon xua daxita coyeneintha canamataxeina.

<sup>6</sup> Ichitha barapomonaē bequein Nacom cata daxita barapo coyenein, daichitha anoxuae barapomonaē jopa Nacom xanepanaya beta tsita jinompaetsi jopa Cristo peyabara jume cowuntsixaetsi. Bequein ichamonaē nanta xeinaetsipa xua pinaē Nacom Pejume Diwesi jopa ainya cuiyo xua barapomonaē jopa peexanaexae pocotsiwa Nacom itoroba, ichitha baraxua jopa xainyeyo pocotsiwa barapomonaē nanta xeina. Baraxua jame tsita itapeinya xeina xua apara jopa daxitiyo pomonaē Israel pia pemomoxi susato jiwi tatsi xua Nacom piamonaē tatsi. <sup>7</sup> Matautano Abraham pia pemomoxi susato jiwi tatsi apara jopa daxitiyo barapomonaē xua Nacom piamonaē

tatsi. Nacom caena bayatha tsipaeba Abrahamtha, jeye: “Xam xeinaename pomonae pepa jinya nemomoxi susato jiwi xua Isaac pon nexanto xua pia pexui jiwana tatsi”, jei Nacom. <sup>8</sup> Baxua naca yaputane exana xua Nacom jopa exanaeyo daxita xua Abraham pia pemomoxi susato jiwi tatsi be Nacom pia pexui tatsi. Nacom meisa be pia pexui cana exana pomonaetha pomonae pejume cowuntsixae xua Nacom pia peyabara tsiwuna muxu dutsiwa. Barapomonae jume cowunta Nacom pia peyabara tsiwuna muxu dutsiwa xua Cristo capanenebiyaena barapomonae. <sup>9</sup> Tsipei Nacom tsipaeba Abrahamtha poxona yabara tsiwuna muxu duta. Nacom jeye: “Barapo xometotha xua icha weitha taitorobi coyenewatha bapoxonae Sara pexanto pabetsina pebin wuto xua nexanto tsane”, jei Nacom.

<sup>10</sup> Jopa meisa baxuiyo, ichawano Nacom exana. Sara pexanto tatsi naexana pewun Isaac. Poxonae Isaac pinyo, bapon nacueyoba piowa, pewun Rebeca. Rebeca tanama ecatsibe pebin wutobe. Barapo pexuyobe cae axa nantautabe bapon Isaac, pon wamo susatopin. <sup>11-13</sup> Caena bayatha pewunaeya poxonae barapoyobe jopa naexanaebe, xuano pewunaeya xua poxonae barapoyobe jopa abe exanaeyobe matautano pewunaeya xua poxonae jopa wuna exanaebe, bapoxonae Nacom tsipaeba Rebeca tsipaebatsi. Nacom jeye: “Pon xua copiya naexanaena bapon peyapin canamataxeinaeinchi”, jei Nacom. Barapo jume bara nayaraba jume japabe xua icha diwesitha Nacom Pejume Diwesitha xua Rebeca pexantobe tatsi yabara paebatsi xua ichaxota, jeye: “Cuita itapetan Jacob xuyapin, ichitha nama Esaú naitematan matapin”, jei Nacom Pejume Diwesitha. Baxua naca yaputane exana xua Nacom pia coya itapeta pomonaetha pomonae xua peichichipaewa, xua pewabiwa barapomonae. Nacom



jopa yabara itapetsiyo barapomonae peexanaexae pocot-siwa Nacom peichichipaewa.

<sup>14</sup> Ichamonae paeba, xua pinae Nacom jopa xapain exanaeyo poxonae caein jiwana itapeta, xua poxonae ichun naitematatsi. Apara jopa xapain wunaeyo xua barapomonae Nacom yabara paebatsi. <sup>15</sup> Tsipei Nacom paeba Moiestha, jeye: “Pomonae wunaeya yabara nanta xeinaein xua tayawenaenexa, barapomonae beta yawenaein”, jei Nacom. <sup>16</sup> Baxua naca cuiduba xua jopa jiton itapetichi poxoru wunae peexanaexae. Matautano jopa itapetichi xua poxoru peichichipaexae xua peitapetsiwatsi. Saya jame pebiwi itapetatsi poxonae Nacom wunaeya yabara nanta xeina xua peyawenaenexa tsane barapomonae. <sup>17</sup> Nacom cueicueije pejume diwesitha nacia peewatsintha pon Egipto nacuapiwi itorobiya pia pepa peewatsinchi. Nacom jeye bapontha: “Apara xan ponxaein tacoya cacana exanatsi pon Egipto nacuapiwi itorobiya pia pepa peewatsinchi. Painya xantha tapexinya tsita itutsi coyenewa exanaein xua tsita itapeinya xeinaein xua xan xeinan bichocono peayapusu itorobi coyenewa. Matautano exanaein xua daxitan nacuan jiwi taneyabara jume taenexa”, jei Nacom. <sup>18</sup> Daxota yaputainchi xua Nacom itacupatsi xua wunaeya yabara nanta xeina xua peyawenaenexa pontha pon ichichipa xua peyawenaewa. Matautano Nacom saya yabara copata xua ichun pejuntu coyenetha pexeinaewa po coyene pejumefebi coyenewa. Baxuan Nacom cana exana pomonaetha pomonae Nacom ichichipa xua xeinaena barapo coyenein.

<sup>19</sup> Metha paxam pana nebaram xua barapomonae yabara xua pajam: “Poxonae Nacom atene exana pomonaetha pomonae petsita natsicuentisixaetsi xua abe peexanaexae baxua Nacom jopa xaniwaicha exanaeyo

jampa? Nacom copata xua barapomonaе xeina pejuṅtu coyeneintha pejumefebi coyenewan. ¿Barapomonaе Nacom tsita natsicuentatsi jampa, poxonaе Nacom bequein copata baxua jampa?” pajam. <sup>20</sup> Ichitha paca jume notatsi, janje: “¿Paxam pebiwi tsoбenaе pam! ¿Eta po jiwi pam xua painya nejume matsontsonobiwi Nacom? Juruwato jopa itacupaetsi xua pejeiwa pontha pon peexanaexaetsi: ‘¿Eta xua metha bara necanauta jutsiya exaname?’ xua pejeiwa juruwato. Bapana juruwato jopa itacupaetsi xua pepaеbiwa baxua”, paca jeichi. <sup>21</sup> Pon xua juruwato peexanaein bapon itacupatsi xua cae tsorobotha jiwana exana ainya juruwaton xua seicayan be pocotsi coyeneya xua ichichipa. Bapon itacupatsi xua pexeinya juruwato exana xua bichocono ainya matoma. Matautano bapon itacupatsi xua bara cana exana xua jopa wṅaeyo xua saya pecasetsinexa.

<sup>22</sup> Nacom barichi itacupatsi xua jiwi pecana exanaewatsi be pocotsi coyeneya xua ichichipa. Bequein Nacom ichichipa tsita ituta pia peanaepanaewa pomonaetha pomonaе abe peexanaewi, ichitha jopa cataunxuae baxua exanaeyo. Matautano bequein ichichipa tsita ituta pia peayapusu itorobi coyenewa po coyene xua barapomonaе tupa peexanaewatsi, ichitha Nacom jopa cataunxuae baxua cana exanaeyo barapomonaetha. Ichitha Nacom caena bayatha beitatemaya taetaepona xua barapomonaе abe pia peexanae coyenewan, po abe coyenewan xua Nacom anaepana exanatsi. Barapomonaе muxu peweraweracae exanaetsi abe peexanaexae. <sup>23</sup> Nacom beitatemaya naca taetaepona wanaca tsita itutsinexa daxita waxainchi xua bichocono bara ichichipa xua wanaca yawenaewa tsane bayatha itapeta wanaca antobewaxae. Caena bayatha Nacom yabara naca tsiwṅaeta xua iru waxeinaenexa Nacom pia pexeinya juṅtu coyenewa xua

bichocono peantobewa. <sup>24</sup> Nacom naca waba pomonaexaetsi pomonae judiomonae jiwanaetsi. Matautano Nacom naca waba pomonaexaetsi pomonae jopa judiomonae naexanaeyo jiwanaetsi. <sup>25</sup> Baxua Nacom yabara paeba pejume diwesitha pomonae yabara, pomonae jopa judiomonae naexanaeyo po diwesitha ichaxota Oseas tina. Nacom jeye:

“Pomonae copiya jopa tamonaeyo, barapomonae yabara jan tsane, ‘Apara tamonae’, jan tsane. Matautano pomonae copiya jopa antobeinyo barapomonae yabara jan tsane: ‘Apara taantobe jiwi’, jan tsane.

<sup>26</sup> Matautano ichaxota ba jiwi yabara jan: ‘Paxam jopa tamonae pam’, jan, baraxota barapomonae yabara jan tsane: ‘Apara paxam tapexui pam, po Nacomxaein ataya tsitecaeya jiwi asu jinompa taexanaein’, jan tsane”, jei Nacom, ichaxota po diwesitha Oseas tina pon caena bayatha tupa.

<sup>27</sup> Barichi iru Isaiás yabara jeye judiomonae: “Bequein judiomonae bichocono jiwi ayaxa icha taetowan ichi xua bobena mar mene itapatha, daichitha saya be conotha barapo judiomonae jiwana pomonae xua Nacom capanenebiya. <sup>28</sup> Saya conotha capanenebiya tsipei Nacom methaunxuae yabara paebina daxita jiwi barapo cae pin nacuathepiwi pia petsita natsicuentisixaetsi xua abe petsita exanaexaetsi. Yawano jiwi ayei weraweraca exanaeinchi xua Nacom exanaena”, jei Isaiás. <sup>29</sup> Isaiás copiya yabara tsiwunaee muxu duta, jeye:

“Nacom apara bapon pon xua itoroba daxita coyeneintha.

Bapon wunaeya naca yabara nanta xeina xua wanaca yawenaewa tsane xua awiya be conotha pejinompaenexa pomonae wamomoxi

susato jiwi jiwana, xua daxita  
jopa peweraweracaewa tsane.

Icha Nacom jopa baxua exanaetsipae, bapoxonae  
waxainchi bara naca juta ichipae icha bayatha  
Sodoma tomarapiwi cana ichichi, matautano icha  
matha Gomorra tomarapiwi cana ichichi xua  
daxita weraweraca”, jei Isaías  
Nacom Pejume Diwesitha.

*Meje yabara xua judiomonae jopa jume cowantsiyo* Na-  
com pia pexeinya jume diwesi tatsi

<sup>30</sup> Barapo peyabara jutiya paebiwana naca yaputane  
exana xua apara pomonae jopa judiomonae naexanaeyo  
Nacom jopa tsitatsi xua barapomonae penatsicuentisiwa  
xua abe peexanaexae. Baxua Nacom cana exana bara-  
pomonaetha bequein barapomonae jopa tsaqueinaeyo  
xua pexeinaewa pejuntũ coyene xanepanaewa Nacomtha.  
Barapomonae xeina pejuntũ coyene xanepanaewa Na-  
comtha Cristo pejume cowantsixaetsi. <sup>31</sup> Ichitha nama  
barapo judiomonae paeba, jeye: “Nacom naca juntũ  
coyene xanepana exanaena xua jopa Nacom watsita  
natsicuentisinexatsi xua abe waexanaexaetsi bapontha.  
Bapon baxua naca cana exanaena icha exanaeinchi pocot-  
siwa Moisés pia peitorobi coyenewatha itoroba”, jei  
barapomonae. Daichitha barapomonae judiomonae jopa  
itacupaetsi xua daxita peyabara jume cuiya exanaewa  
pocotsiwa Moisés itoroba pia peitorobi coyenewatha.  
<sup>32</sup> ¿Eta xua metha jane xua barapomonae jopa itacupaetsi  
xua exana pocotsiwa Moisés pia peitorobi coyenewatha  
itoroba? Metha poxoru barapomonae nanta xeina xua  
poxonae beta exana bapoxonae jopa pexeinaewa tsane  
penatsicuentisiwa Nacomtha. Barapomonae jopa jume

cowuntsiyo xua Nacom itorobica Cristo, daxota barapomonaе Nacom tsita natsicuentatsi xua abe petsita exanaexaetsi. Barapomonaе nacabeta exana, poxonaе jopa jume cowuntsiyo Nacom, atene peexanaexaetsi tsane icha jiton ichi poxonaе xuirapopa ibototha xua pia coutha nacabeta exana xua atene naexana. <sup>33</sup> Nacom Cristo yabara paebatsi pejume diwesitha. Icha jiji ichi poxonaе nacabeta poxonaе xuirabathopa ibototha, barichi jiji nacabeta poxonaе Cristo jopa jume cowuntichi. Nacom jeye:

“Jerusalén tomaratha po tomara atororo xua po tomara pewun Sión barapo tomaratha notsin pon jiji pecapanenebiyaenexa tsainchi. Jiji nacabeta exana poxoru barapo jiji jopa jume cowuntsiyo bapontha, icha jiji ichi xua nacabeta exana poxonaе xuirabathopa ibototha. Pon jume cowuntsina bapontha, jopa bapana juntu natsepanayae tsane”, jei Nacom.

## 10

<sup>1</sup> Tamonaе pam, paxam pomonaе iru painya nejume cowuntsiwixae Jesucristo. Maisa bichocono tajuntu coyenewatha ichichipan daxota bichocono Nacomtha tsipaeban judiomonaе nexa, xua barapomonaе pecapanenebiyaenexa tsainchi abe pia peexanaе cuiru coyenein weya. <sup>2</sup> Barapomonaе yabara paeban xua barapomonaе judiomonaе bequein ichichipa nawita xua Nacom petanacuichiwatsi, daichitha jopa yaputaeyo xua pocotsiwa Nacom xaniwaicha ichichipa xua barapomonaе peexanaewa. <sup>3</sup> Barapomonaе jopa yabara yaputaeyo xua pocotsiwa poxonaе Nacom juntu coyene xanepana exana jiwitha xua jopa xeinaeyo penatsicuentisiwa

Nacomtha xua abe peexanaexae. Barapomonae jujuta xua icha barompaya pia cui coyeneyatha exanaena xua bapoxonae pexeinaenexa tsane pejuntũ coyene xanepanaewa Nacomtha xua jopa penatsicuentiwa xua abe peexanaexae. Barapomonae jopa exanaeyo be pocotsi coyene Nacom itoroba jiwitha xua Cristo pejume cowũntsixaetsi xua bapoxonae jiwi pexeinaenexa pejuntũ coyene xanepanaewa Nacomtha. <sup>4</sup> Barapomonae jopa yabara yaputaeyo xua po coyene Cristo jopa ainya cui cana exanaeyo Moisés pia peitorobi coyenewa tatsi. Daxota anoxuae jiwi jopa cana matawenonaeyo barapo Moisés pia peitorobi coyenewa tatsi xua po peitorobi coyenewa bequein jiwi yabara nanta xeina xua pinae poxonae yabara jume cuiya exanaena pinae xeinaena pejuntũ coyene xanepanaewa.

<sup>5</sup> Caena bayatha Moisés yabara paeba xua pinae pia peitorobi coyene tatsi itacũpatsi xua jiwi jũntũ coyene xanepana exanatsi Nacomtha xua jopa pet-sita natsicuentiwa xua abe peexanaexae. Moisés jeye: “Pon daxita yabara jume cuiya eexanaponaena barapo taitorobi coyenewa xua tinan, bapoxonae bapon bara ataya tsitecaeya poponaena peajũntũyapusũ coyenewatha”, jei Moisés. <sup>6</sup> Nacom Pejume Diwesitha yabara paeba pomonae jopa xeinaeyo penatsicuentiwa Nacomtha pejume cowũntsixae Cristotha. Nacom jeye: “Jopa pananthũthũ yainyabinde, jopa pajande: ‘Jintam metha itaboco beicha ponaena xua Cristo pecatsicaenexa tsainchi barapo cae pin nacuathe tsique xua wanaca yawenaenexa?’ jopa pajande. <sup>7</sup> Mataũtano jopa pajande: ‘Jintam metha ira bereca ponaena xua Cristo pecatsinaenexa tsainchi barapo cae pin nacuathe xua petũpae cuiru coyene weya?’ jopa pajande”, jei Nacom. <sup>8</sup> Nacom equeicha pejume diwesitha pejuntũ coyene xanepanaewa

yabara jeye: “Tajume diwesi bara imoxoyo dubena xua paca itacupa painya necueicueijeinexa barapo diwesi. Matautano paca itacupa xua painya neyabara nanta xeinaewa barapo diwesi”, jei Nacom xua pejume diwesitha. Barapo diwesi bara najupabe po diwesi xua yabara paca cuidubatsi xua painya nejume cowuntsiwa. <sup>9</sup> Icha paichichipame xua Nacom painya nepaca capanenebiwa bewa paexanaename barapo coyenewabe: Bewa icha-monaetha payabara paebim xua Jesús painya Nepacacanamataxeinaein. Matautano bewa pajume cowuntsim painya nejuntũ coyeneintha xua Nacom Jesús equeicha asũ exanatsi petupae cuiru coyene weya. Bapoxonae Nacom paca capanenebiyaena abe painya neexanae coyenewan weya. <sup>10</sup> Poxonae jiton jume cowunta pia juntũ coyenewatha Jesthathapoxonae jopa Nacom tsita natsicuentisichi xua abe petsita exanaexaetsi. Poxonae jiton yabara cueicueijei xua Jesucristo apara pia Pecanamataxeinaeinchi, bapoxonae Nacom capanepa bapon abe pia peexanae cuiru coyenewan weya.

<sup>11</sup> Nacom Pejume Diwesitha jeye: “Pon jume cowunta Cristotha, Cristo yawenaena xua daxota jopa bapana juntũ coyene natsepanayae tsane”, jei Nacom, xua pejume diwesitha. <sup>12</sup> Nacom jopa tsita seicayatsi daxita jiwi, bara saya tsita najupatsi, bequein bara metha judiomonae tsipae irũno metha bequein jopa dapomonae tsipae pomonae jopa judiomonae naexanaeyo. Bapon Cristo Pecanamataxeinaein exanatsi daxita jiwi nexa. Yawano bapon Cristo Wanacanamataxeinaein jopa juniya catsiyo daxita piawan pomonaetha pomonae pewũcae jiwixaetsi. <sup>13</sup> Tsipei Nacom Pejume Diwesitha jeye: “Daxita pomonae wũca pontha pon jiwi Pecanamataxeinaein, pon Cristo, xua pecapanenebiyaenexa tsainchi, barapomonae bara capanenebiya tsainchi”, jei Nacom.

<sup>14</sup> Jiwi jopa itacupaetsi xua petsipaebiwa pontha pon jiwi Pecanamataxeinaein icha jopa jume cowuntsiyo bapontha. Matautano jopa itacupaetsi xua pejume cowuntsiwa pontha pon jiwi Pecanamataxeinaein icha jopa bapana yabara jume yaputae bapontha. Matautano jiwi jopa itacupaetsi xua peyabara jume yaputaewa bapon icha ichamonae jopa capanaeyo barapo diwesi xua pecueicueijeinexa barapo jiwitha, xua peyabara paebiwatsi pon jiwi Pecanamataxeinaein. <sup>15</sup> Matautano jiwi jopa itacupaetsi xua pecueicueijeiwa xua po diwesi pon jiwi Pecanamataxeinaein peyabara paebiwatsi icha dapomonaе ajibi pomonaе itoroba barapomonaetha xua barapomonaе pecueicueijeinexa. Nacom Pejume Diwesitha yabara jei baxua: “Maisa bichocono daxua wanae xua poxonaе jiwi pata xua pecueicueijeinexa Nacom pia pexeinya jume diwesi xua Cristo peyabara paebiwatsi”, jei Nacom Pejume Diwesitha.

<sup>16</sup> Daichitha jopa daxita jiwiyoy xua ichichipa pejume taewa barapo pexeinya jume diwesi. Baxua Isaías yabara jei Nacom Pejume Diwesitha: “Tanecanamataxeinaem ¿jintam jume cowanta pocotsiwa papaeban? Saya be conotha jiwi, pomonaе jume cowanta xua pata tacayabara paebiwatsi”, jei Isafas. <sup>17</sup> Daxota jiwi jume cowanta poxonaе jume tane barapo pexeinya jume diwesi. Po pexeinya jume diwesi jiwi jume cowanta apara po diwesi xua Cristo yabara.

<sup>18</sup> Tacoya nayainyaban. Nabaran, janje: ¿Metha bara barapomonaе judiomonaе barapo pexeinya jume diwesi jopa jume taeyo jampa? ¿Jume apara, apara bara jume tane barapo pexeinya jume diwesi! najan. Nacom Pejume Diwesitha baxua yabara jeye:

“Nacom piamonaе tatsi capona Nacom Pejume Diwesi tajū beya.



Po diwesiñ xua barapomonaē paeba taju beya jume pichapona daxita barapo cae pin nacuathe”, jei Nacom Pejume Diwesitha.

<sup>19</sup> Equeicha nayainyaban, janje: ¿Metha bara barapomonaē judiomonaē jopa yaputaeyo xua barapo diwesi ichamonaē jume cowuntsina? najan. ¡Jume! ¡Apara bara yaputane! najan. Barapomonaē yaputane tsipei Moisés baxua caena bayatha copiya yabara tsiwunaē muxu duta. Moisés tatina Nacom, xua Nacom jeye:

“Ichamonaē capanenebiyan pomonaē jopa judiomonaē naexanaeyo.

Paxam paca exanatsi xua barapomonaē pauwame.

Ichamonaē capanenebiyan pomonaē jopa bichocono peyaputae jiwi.

Paxam paca exanatsi xua baxua paca anaepana exana, jei Nacom”, xua Moisés tatina.

<sup>20</sup> Bapoxonaē iru pirapae Isaías atsaquiya yabara tsiwunaē muxu duta Nacom nexa xua Nacom jeye:

“Pomonaē jopa nejeichiyo bara necaxiba.

Pomonaē jopa neyabara yainyabiyo bara barapomonaē cana exanan xua barapomonaē neyaputane”, jei Nacom, xua Isaías tatina.

<sup>21</sup> Equeicha Isaías yabara tsiwunaē muxu duta judiomonaē Nacom nexa, xua Nacom jeye: “Daxita matacabi wabeiban barapomonaē. Ichitha barapomonaē jopa exaneibiyo pocotsiwa itorobeiban tsipei barapomonaē tanejume torobabeibi jiwi xua jopa, tanejume cowuntsiwa”, jei Nacom, xua Isaías tatina.

## 11

*Meje yabara xua Nacom itapeta judiomonaēpiwi pomonaē Israel pon caena bayatha tupa bapon piamonaē tatsi*

<sup>1</sup> Equeicha nayainyaban najan: ¿Metha bara Nacom torota daxita piamonae israelmonae jampa? najan. Jume apara, tsipei apara xan barapo israelmonae jiwana pin, daxota jopa netorotsiyo, Abraham pia saineiwimonae jiwana tatsin apara, matautano Benjamín pia pemomoxi susato jiwi jiwana tatsin apara. <sup>2</sup> Nacom jopa torotsiyo piamonae pomonae xua caena bayatha peitapetsixae xua cana exana be piamonae tatsi. Paxam payaputaneme xua Nacom Pejume Diwesitha paeba, po diwesitha ichaxota Elías tsipaeba Nacomtha. Elías pon Nacom pia peitorobi jume pepaebin pon caena bayatha tupa. Elías anaya yabara paeba israelmonae, jeye: <sup>3</sup> “Nacom ponxaem Tanecanamataxeinaem, barapo israelmonae juteba, jutebatsi pomonae jinya neitorobi jume pepaebiwi. Matautano barapo israelmonae cayatsiya abe exana pocotsiwan iboton xua xuan xota duwei yubeibiya jutebathopeiba xua poxonae catsita tuxusi exana. Xan compan napaeban xua pomonae beta necajume cowuntsiwi barapomonae jiwanan. Iruru barapomonae ichichipa nebexubaru”, jei Elías poxonae tsipaeba Nacomtha. <sup>4</sup> Ichitha Nacom Elías jume notatsi. Nacom jeye: “Awiya cataunxuae xeinan siete mil pebiwi xua tamonae, pomonae tanejume cowuntsi jiwi. Barapomonae jopa pentabocototha umenaeyo xua poxonae wuna pejainchinexa ibo nacom, po ibo nacom pewun Baal”, jei Nacom. <sup>5</sup> Nama anoxuae awiya barichi israelmonae be conotha pomonae jume cowunta Nacomtha pomonae Nacom peitapetsiwi, pia peantobexae barapomonae. <sup>6</sup> Nacom itapeta barapomonae, pomonaetha pomonae peichichipaexae xua peyawenaewa barapomonaetha pia peantobexae. Baxua Nacom amanaya exana barapomonaetha. Nacom jopa itapetsiyo barapomonae, xua peyabara cui matomatsinexa xua peexanaexae pocotsiwa xanepana. Tsipei icha Nacom saya itapeta jiwi,

xua peyabara cui matomatsinexa xua barapo jiwi peex-  
anaexae barapoxonae Nacom be jopa bapana amanaya  
exanaeyo jiwi nexa.

<sup>7</sup> Daxota yaputainchi xua pinmonae xua barapo  
israelmonae jiwana jopa catsibichi pejuntũ coyene  
xanepanaewa xua bequein baxua tsiexana nawita po  
coyenein Moisés itoroba. Jame Nacom cata barapo  
coyene pomonaetha pomonae peitapetsiwixae, xua  
pomonae israelmonae jiwana. Barapomonae, pomonae  
israelmonae jiwana barapomonae Nacom jopa catsibiyo  
barapo pejuntũ coyene xanepanaewa. Nacom copata  
xua barapomonae pejuntũ coyenewatha xeina pejume  
torobabi coyenewa. <sup>8</sup> Nacom Pejume Diwesitha Moisés  
yabara paeba barapomonae. Moisés jeye: “Nacom  
copata xua barapomonae xeinaena po juntũ coyene jopa  
itacũpaetsi xua peyaputaewa. Bequein barapomonae  
yoroba xua pejume xainyei coyenewa daichitha jopa  
yaputaeyo. Matauta bequein barapomonae jume tane  
pexainyei jume daichitha jopa jume cowuntsiyo. Barapo  
coyenein anoxuae cataunxuae baxuan eexanapona”,  
jei Moisés xua Nacom Pejume Diwesitha. <sup>9</sup> Irũrũ David  
yabara paeba israelmonae poxonae Nacom tapaebatsi.  
David jeye:

“Barapomonae beitatemaya juntũ coyene  
weiweinapona pin penabanaewantha.  
Barapomonae nanta xeina xua jopa catsita  
natsicuentisiyo xua abe peexanaexae.  
Poxonae barapomonae cataunxuae eexanapona  
baxua barabũ xam Nacom jemeicha  
atene cana exanaename barapomonae,  
jopa pia necajume cowuntsixae.

<sup>10</sup> Daxota barabũ copatsiname xua barapomonae  
israelmonae jopa yaputaeyo po coyene

xua barapomonae catsita natsicuenta  
 abe necatsita exanaexae.  
 Matautano barabũ copatsiname xua barapomonae  
 xeinaena po peatene coyenewa anthũthũrewewe  
 cana exanatsi xua ataya, abe peexanaexae”,  
 jei David, israelmonae yabara,  
 Nacom Pejume Diwesitha.

*Meje yabara xua pomonae jopa judiomonae naexanaeyo  
 Nacom jume cowũntatsi*

<sup>11</sup> Equeicha tacoya nayainyaban, najan: Poxonae judiomonae, pomonae israelmonaexae, Nacom nawepu tsabatsi, jopa pejume cowũntsixaetsi ħmetha bara Nacom itawetsina barapomonae xua ataya tsane jampa? ħJume apara! ħBarapara Nacom jopa itawetsi tsane xua bara ataya tsane! Nacom capanenebiyaena icha judiomonae bexa tsane. Bequein anoxuae Nacom jopa capanenebiyaeyo barapomonae judiomonae, apara bara capanenebiya abe pia peexanae cuiru coyenein weya tatsi pomonae jopa judiomonae naexanaeyo. Nacom baxua exana xua judiomonae peuwinexa, xua uwatsi pomonae jopa judiomonae naexanaeyo xua barapomonae Nacom pecapanepaexae. <sup>12</sup> Poxoru judiomonae Nacom nawepu tsabatsi daxota Nacom xanepana exana icha monaetha, xua daxita carepaya barapo cae pin nacuathe. Judiomonae jopa Nacom pejume cowũntsixaetsi daxota Nacom xanepana exana, pomonaetha pomonae jopa judiomonae naexanaeyo xua Cristo pejume cowũntsixaetsi. Bexa tsane Nacom xanepana exanaena judiomonaetha pocotsiwa bichocono daxita nacuanpiwi tsita xanepanatsi, xua beyacaincha poxonae xanepana exana pomonaetha pomonae jopa judiomonae naexanaeyo. Baxua Nacom cana exanaena poxonae judiomonae irũ Cristo jume cowũntsinchi.

<sup>13</sup> Anoxuae paca tsipaebatsi pomonae pam pomonae jopa judiomonae naexanaeyo pam. Yaitama Nacom taneitorobixae pomonaetha pomonae jopa judiomonae naexanaeyo, pomonae icha paichim, daxota tsitsipaebaponan Nacom Pejume Diwesi. Barapo tatanacuichiwa Nacom bichocono netsita ainya cui. <sup>14</sup> Beexanaein xua tamonae judiomonae paca uwa, xua bapoxonae barapomonae pejume cowuntsinexa icha paichim. Yawano barapoxonae barapo tamonae jiwana Nacom capanenebiya tsane taexanaexae Nacom nexa. <sup>15</sup> Tsipei poxonae Nacom itaweta barapomonae judiomonae bapoxonae Nacom itapeta ichamonae pomonae barapo cae pin nacuapiwi jiwana xua pecanaexanaenexa pia jiwimonae tatsi. Poxonae judiomonae iru cana exanaeinchi Nacom pia jiwimonae tatsi Cristo pejume cowuntsixaetsi baxua bichocono wuna tsane be poxonae jiwi equeicha asu exanatsi petupae cuiru coyene weya. <sup>16</sup> Ainya pecayabara juta pepaebi diwesiyo be paca tsipaebatsi. Poxonae jiwi ba pentubu tsequeta xua cae pan exana pecatsinexa Nacomtha barapo pan matabuyo bara Nacom piawa tatsi. Barichi pepa matabu barapara Nacom piawa tatsi. Barichi poxonae jiwi ba paeba xua pinae nae petabu opina catsina Nacomtha bara Nacom piawa tatsi. Barichi pepa maxuranan barapara Nacom piawa tatsi. Icha barapocotsi naxobe coyenewabe cana ichiya exana jiwi, barapocotsi juta coyeneya Nacom cana exana jiwitha. Poxoru Abraham iru pomonae Nacom peitorobi jume pepaebiwi barapomonae Nacom piamonae tatsi daxota iru pia pexui tatsi iru Nacom piamonae tatsi.

<sup>17</sup> Equeicha pecayabara juta pepaebi diwesiyo paca tsipaebatsi. Jiwi itacupatsi xua olivo nae jiwana maxuranan weucuboba po nae ubanota pabitha xua bebai. Icha

olivo nae maxuranaan jiwana weucuboba, po nae untha uncua. Barapo maxuranaan wantha japateita cãtsiya duba po naetha po nae uncua pabitha, po nae copiya jiwana maxuranaan bebai. Barapo nae tabũ opinan aisa cana exana xua barapo maxuranaan beta nacoita tsipei mene nota barapo nae tabũ opina tsina. Bara jũta coyeneya ichi, icha olivo naetha cana ichichi, Nacom jiwi barapocotsi coyeneya cana ichi. Nacom jiwana torota po judiomonae jopa pejume cowũntsixaetsi xua bapoxonae Nacom paca cana exana piamonae tatsi pam. Nacom paca cana exana xua peajũntũyapusũwa painya nexeiaewa painya nejume cowũntsixae Jesucristo. Barapo coyene icha be poxonae pemaxuranaan cana ichichi poxonae aisa cana exainchi pemene notsixae petabũ opinan tsina, xua beta xu xuwa exana pena maxuranatha. <sup>18</sup> Daxota jopa paatsaquiya aebiya nanta xeinaeinde xua ainya cui jiwi pam xua Nacom painya nepaca wabixae beyacaincha icha judiomonae pomonae Nacom torota. Payabara nanta xeinare barapo olivo nae xua pecayabara jũta paebiwa. Barapo maxuranaan jopa apara nacoita exanaeyo barapo nae tabũ opina deca. Jame apara barapo nae tabũ opina nacoita exaneina barapo maxuranantha.

<sup>19</sup> Metha papaebichipame, pajam tsipae: “Nacom torota judiomonae xua wanaca exanaenexa piamonae tatsichi, xua icha jiwi cana ichi olivo naetha”, pajam tsipae.

<sup>20</sup> Metha moya bara xainyei tsipae. Bara Nacom torota barapomonae judiomonae jopa pejume cowũntsiwixaeetsi Jesucristo. Paxam Nacom piamonae tatsi paca cana exana, tsipei saya apara pajume cowũntame Jesucristo, saya meisa baxuaxae. Jopa pana najũntũ coyene yabara atsacande xua painya nexeiaexae pocotsiwa Nacom paca cata. Jame saya dota pam xua jopa xanepanaeya pajume cowũntsim Jesucristo xua daxota Nacom painya nepaca torotsiwa tsane. Jiwi pemaxuranaan ucubobiya

bebai po nae pabitha uncua. <sup>21</sup> Bara j̄ta coyene ichi, Nacom torota judiomonaē pomonaē copiya piamonaēxae tatsi jopa pejume cow̄ntsixaē Jesucristo. Nacom bara paca ichipae paca torotsipa icha jopa pajume cow̄ntsi-paem. <sup>22</sup> Anoxuae waxainchi yaputainchi xua Nacom yawena jiwi, peantobexae. Yawano yaputainchi xua Nacom ayapube taexana ichamonaē pomonaētha pomonaē abe peexanaē jiwixaē. Nacom daunweya yabara paeba penatsicuentaſiwa pomonaē xua jopa pejume cow̄ntsi-wichi. Ichitha Nacom beta xanepanaya paca cana exana. Nacom baxua paca cana exanaena icha awiya pajume cow̄nta dubenanaēbiyaename. Ichitha icha awiya jopa pajume cocow̄ntaponaem tsane Nacom paca torotsina. <sup>23</sup> Matautano Nacom itac̄patsi xua eque-icha caewa cana exana piamonaē judiomonaē, pomonaē Nacom bayatha copiya bequein petorotsixaē. Nacom baxua cana exanaena icha jame barapomonaē Cristo jume cow̄ntsinchi. Nacom baxua cana exanaena icha jiton ichi xua equeicha caewa pecoutha japateita c̄tanota wantha pemax̄rana, po max̄rana bequein ucuibiya xuba. <sup>24</sup> Paxam pomonaē jopa judiomonaē naexanaeyo pam, Nacom paca cana exana piamonaē tatsi pam, bequein copiya jopa piamonaē tatsi pam. Nacom bara paca cana ichi, icha be pocotsi coyeneya pebin ichi xua unupi olivo nae max̄rana ucuiba. Equeicha barapo max̄rana icha olivo nae max̄rana wantha japateita c̄tsiya duta po olivo nae pabitha ūbanota. Bapoxonaē barapo unupi olivo nae max̄ranatha pexeinya thei xuwa. Ichitha icha pebin equeicha pita po max̄rana xua ucuiba pepa olivo nae weya yawa equeicha caewa pecoutha japateita c̄tanota wantha, barapo max̄rana beta xuwa beyacaincha xua xuwa unupi olivo nae max̄rana poxonaē japateita c̄tanota wantha. Icha pebin ichi, Nacom bara itac̄patsi cana

exana judiomonaetha. Nacom tayapu xanepanatsi xua equeicha exana piamonae tatsi pomonae copiya torota pomonae judiomonae.

*Meje yabara xua Nacom bexa tsane israelmonae capanenebiya tsainchi*

<sup>25</sup> Tamonae pam, paxam pomonae iru painya nejume cowuntsiwixae Jesucristotha. Maisa ichichipan xua paxam yabara painya neyaputaewa tsane xua moya peyawun xeinaewa po coyene xua Nacom yabara po coyene ichamonae jopa yaputaeyo. Tsipei jopa ichipaeinyo xua painya coutha painya nenayabara nanta xeinaewam xua peyaputae jiwí pam. Meje baxue xua moya peyawun xeinaewan: Anoxuae israelmonae xeina pejuntu coyenewatha po coyene xua Nacom pejume torobabi coyenewatsi xua daxota Nacom jopa pejume cowuntsiwatsi. Ichitha jame bexa poxonae abu daxita carepaya jume cowuntsina Nacom pomonae jopa judiomonae naexanaeyo pomonae Nacom itapeta, bapoxonae equeicha judiomonae jume cowuntsina.

<sup>26</sup> Bapoxonae daxita israelmonaexae pomonae judiomonaexae pomonae Nacom itapeta, capanenebiya tsainchi abe pia peexanae cuiru coyenewan weya tatsi. Nacom baxua yabara jeye pejume diwesitha: “Pon jiwí Pecapanenebiyaein patopaena israelmonae jiwánatha pomonae Sión tomara wunmonae.

Baron juntu coyene wepichina Jacob pia pemomoxi susato jiwí tatsi abe pia peexanae cuiru coyenewan tatsi, pomonae israelmonaexae.

<sup>27</sup> Juntu coyene wepichin barapo judiomonae abe pia peexanae cuiru coyenewan tatsi.

Barapoxonae cayabara jume weta exanaein pocotsiwa caena bayatha yabara tsiwunae muxu dutan barapomonae pia pamo susato jitontha



tatsi pon pewun Jacob, pon Israelxae”,  
 jei Nacom Pejume Diwesitha.

<sup>28</sup> Ichamonae xua israelmonae jiwana anoxuae barapomonae Nacom pia peaitafaetabi jiwichi tsipei barapomonae jopa jume cowuntsiyo Nacom pia pexeinya jume diwesi tatsi po diwesi Cristo pepatopaewa yabara. Tsipei barapomonae baxua exana, daxota paxam pomonae jopa judiomonae naexanaeyo pam, bara paca itacupa xua painya nejume cowuntsiwa Cristo. Ichitha barapo israelmonae Nacom caena bayatha copiya itapeta. Barapo israelmonae awiya Nacom antobe, pia pamo susato jiwi tatsi copiya peitapetsixaetsi. <sup>29</sup> Tsipei Nacom jopa ichawa beya paebiyo. Pocotsiwa Nacom cata equeicha jopa caewa pichiyo. Pomonae Nacom itapeta equeicha jopa itawetsiyo. <sup>30</sup> Paxam pomonae jopa judiomonae painya nenaexanaewi pam, copiya paxam jopa painya neexanae jiwi pam pocotsiwa Nacom paca itoroba. Daichitha anoxuae judiomonae jopa peexanaexae pocotsiwa Nacom itoroba, daxota Nacom wunaeya paca yabara nanta xeina pia nepaca cayawenaewa tsane. <sup>31</sup> Ichitha anoxuae bequein barapomonae judiomonae jopa exanaeyo pocotsiwa xua Nacom ichichipa, bexa tsane barapomonae judiomonae jume cowuntsina. Poxonae baxua exanaena Nacom, xua wunaeya paca yabara nanta xeina pia nepaca cayawenaewa tsane iru wunaeya yabara nanta xeinaena peyawenaenexa tsane xua barapomonae peyawenaenexatsi pia peantobewixae. Nacom baxua exanaena barapomonae aetha icha bayatha pacata ichi xua poxonae Nacom pacata exana. <sup>32</sup> Nacom bara copata xua daxita jiwi bara najupa xua penatsicuentiwa xua jopa pejume cowuntsixaetsi. Nacom bara baxua copata, xua penanta jupiya yawenaenexa daxita jiwi, peantobexae.

<sup>33</sup> ¡Maisa jopa juniya Nacom yawenaeyo jiwitha! ¡Maisa

Nacom jopa juniya xeinaeyo peyabara yaputae coyenewan po coyene xua xaniwaicha pecayabara exanaewa! ¡Maisa Nacom jopa juniya yabara tsiwunaeyo yaputaeyo peyaputae coyenein xua bexa exanaena! ¡Dapon ajibi pon itacupatsi xua pecayabara yaputaeya paebiwa pocotsiwa Nacom cuita yabara exana! ¡Barichi dapon ajibi pon itacupatsi xua peyaputaewa Nacom pia cui coyenewan tatsi! <sup>34</sup> Nacom Pejume Diwesitha tatsi yabara jeye baxua: “Dapon ajibi, pon yaputane pocotsiwa Nacom nanta xeina pon jiwi Pecanamataxeinaeinxae. Matautano dapon ajibi, pon xua Nacom pecuidubiwatsi. <sup>35</sup> Matautano dapon ajibi pon cata Nacomtha xua daxota xuya bewa Nacom matomatsina”, jei Nacom Pejume Diwesitha tatsi. <sup>36</sup> Aparaxita coyenein Nacom forota. Nacom canamataxeina pia peyayapusu itorobi coyenewatha daxitan pocotsiwan xua xuan exana. Daxitan bara piawa tatsi. ¡Barabu Nacom wunaeyo jainteibatsi xua ataya tsaibi tsanel! ¡Je, bara ichi tsanel!

## 12

### *Meje yabara xua wajinompaewa wataexanaenexa Nacom*

<sup>1</sup> Tamonaeyo pam, paxam pomonaeyo iru painya nejume cowuntsiwixae Jesús. Paxam payaputaneme xua Nacom bichocono naca yawena pia wanaca antobexae. Daxota paca itorobatsi daxita pam. Pana najuntu coyene doure Nacomtha painya nenacuichinexa pocotsiwa Nacom paca itoroba. Baxua bara be poxonaeyo jiton ovejiyo asu cata xua pebexubinexa Nacom nexa. Poxonaeyo pana najuntu coyene doutame Nacomtha barapo coyene Nacom tsita xanepanatsi. Barapocotsi coyenewatha bewa wunaeyo pajaintsiname Nacom painya juntu coyeneintha. <sup>2</sup> Jopa bara paichiponaeyo xua abe paexanaponame po coyenewan icha ichi xua exana dubenanaebiya pomonaeyo barapo cae

pin nacuathe jinompa. Jame maisa bara pacopare xua Nacom paca necanaexanaenexa xua icha jũntũ coyene paxeiname xua beta painya nenanta xeinaponaenam tsane. Bapoxonae payaputaename xua bara painya nexanaewa pocotsiwa Nacom ichichipa. Pocotsiwa Nacom peichichipaewa xua apara painya neexanaponaewa tsane xua meje: pocotsiwa bara wũnae, mataũtano pocotsiwa Nacom pejũntũ coyene weiweina exanaewatsi, mataũtano pocotsiwa daxita bichocono matapaeicha xanepana.

<sup>3</sup> Nacom taneantobexae necata barapo peayapusũ itorobi coyenewa xua tapaca itorobiwatsi pocotsiwa yabara bewa paexanaename. Daxota baxua paca tsi-paebatsi xua paxam jopa bewa pana nayabara nanta xeinaem xua peainya cui jiwi pam beyacaincha poxonae Nacom pia coutha ainya cui paca cana exana. Nacom paca catsiba pejume cowũntsiwa daxita carepaya paxamtha. Daxota bewa daxita paxam xainyeya pana nayabara nanta xeinaem pocotsiwa painya neexanaexae xua icha be pocotsi coyeneya Nacom painya nepaca itorobixae pocotsiwa bewa paexanaename. <sup>4</sup> Wapepontha nawita xeinatsi xua wanaca cueyatsiwan, bara bequein cae pepontsi. Daxita barapo wanaca cueyatsiwan wapepontha jopa nanta jũpae coyeneya exanaeyo. <sup>5</sup> Waxainchi bara ichichi bara bequein pinmonaetsi ichitha waxainchi be cae pepontsi Cristotha. Ichitha apara daxitatsi bara caemonae naexainchi wajume cowũntsixae Cristo. Caemonae wanaexanaexae Cristotha, daxota nantia nayawenatsi.

<sup>6</sup> Nacom daxita carepaya barompaya naca catsiba wajũntũ coyeneya waexanae coyenewan, peichichipaexae xua naca yawenaena wanaca antobexae. Barapo jũntũ coyeneyatha waxainchi barompaya bewa beta taexanaetsi Nacom wanaca catsixae barapo coyene. Icha-

monaetha Nacom naca jiwana catatsi po coyene xua peyabara yaputaeya cueicueijejey coyenewa Nacom Pejume Diwesi. Bapoxonae barapomonae bewa cueicueijejey barapo diwesi jiwitha. Bapomonae bewa exanae baxua daxita po pejume cowuntsiwatha Nacom bapomonaetha cata. <sup>7</sup>Ichamonaetha Nacom naca jiwana catatsi, po coyene xua ichamonae peyawenaewatsi. Barapomonae bewa moya ichamonae bara beta yawenaetsi. Ichamonae Nacom naca jiwana catatsi po coyene xua ichamonae pecuidubiwatsi. Pomonae yaputane xua pecuidubiwa ichamonaetha, bewa moya bara beta cuidubina ichamonaetha. <sup>8</sup>Ichamonaetha Nacom naca jiwana catatsi peyaputae coyenewa po coyenewa xua pejuntũ cui coyene tsacabinexa pejume cowuntsiwi xua jũntema pejinompaenexa. Pomonaetha Nacom cata barapo peyaputae coyenewa bapomonae bewa moya bara beta jũntũ cui coyene tsacabina ichamonae. Ichamonaetha Nacom naca jiwana catatsi peyaputae coyenewa po coyenewa xua piawan peroutsiwa ichamonaetha. Bapomonae bewa jopa asiwiyo, moya bara bewa amanaya doutsina ichamonaetha. Ichamonaetha Nacom naca jiwana catatsi peyaputae coyenewa po coyenewa xua piamonae canamataxeinaeya itoroba. Bapomonae bewa moya bara saya daunweya beta canamataxeinaeya itorobaponae. Ichamonaetha Nacom naca jiwana catatsi peyaputae coyenewa po coyenewa xua yawena peacopeibi jwi. Bapomonae bewa moya jũntũ coyene weiweinaeya yawena.

*Meje yabara xua pocotsiwa bewa exanae pomonae pejume cowuntsiwi Cristo*

<sup>9</sup> Poxonae pana naantobem xaniwaicha nantiya caemonae pana naantobeinde. Panaitemare abe peexanae coyenewan. Saya naitomatsiya paexanaponde pocotsiwa pexanepanae coyenewan. <sup>10</sup> Bewa caemonae nantiya

pana naantobem, icha caepi jiwi ichi xua yatsicaewa naantobe xua cae peweicho jiwi. Bewa ichamonae pabarũ cui itura jinaem xua barapomonae peainya cui jiwi beyacaincha paxam.

<sup>11</sup> Juntũ coyene daunweya patanacuire pon jiwi Pecanamataxeinaein. Jopa paacoyenefaetabinde poxonaе pata nacuitame. Antȃcoyenyapũya bapon patanacuire, bi-chocono painya neichichipaexae.

<sup>12</sup> Painya newũnae ewatsixae pocotsiwa xua Nacom paca catsibapaeba bexa daxota pajuntũ coyene weiweinaeya jinompare. Poxonaе ichamonae jopa xapain pacata exanaeyo, xua paca cana exana xua paajuntũcoyenetanem, bara saya jũntema pajinompare. Jopa paaitaconaeinde. Jopa pana cui barapentsinde xua painya tsipaеbeibiwa Nacom.

<sup>13</sup> Nacom piamonae xua irũ pomonae Nacom pejume cowũntsiwixaetsi payawende pocotsiwa xua barapomonae nantawenona. Pantenta weyataeya wabeibare painya bontha pomonae painya nepaca casiwa poneibiwi, pomonae pejume cowũntsiwi Nacom pomonae jopa painya yaitaibi jiwi.

<sup>14</sup> Pomonae paca atene exana painya nejume cowũntsixae Jesucristo barapomonae patawũcare Nacomtha xua Nacom peyawenaewa tsane barapomonae. Nacom jopa patsipaеbinde xua abe pecana exanaewa tsane barapomonaetha.

<sup>15</sup> Irũrũ pajuntũ coyene weiweineibare poxonaе ichamonae juntũ coyene weiweineiba. Ichacuitha pajuntũ coyene wecoyei tsaibindeno poxonaе ichamonae juntũ coyene wecoyei tsaibi.

<sup>16</sup> Peburũya nanta cui jũpaeya pajinompare xua jũntema nantiya pana nabarũ dubenanaebiyame. Jopa ichamonae paaеbinde. Pacana exande painya jiwi xua be

pomonaē pecui pawī jiwī. Jopa pana nayabara nanta xeinaeinde xua painya neyaputae jiwī pam.

<sup>17</sup> Poxonae ichamonae abe pacata exana jopa xuya abe pata exanaeinde barapomonaetha. Jame maisa pananta xeinare xua daxita jiwī xaniwaicha painya netaexanaewa tsane pocotsiwa barapomonaē tsita cui xanepanatsi.

<sup>18</sup> Paexanaponde daxita pocotsiwan paca itacupa, xain bapoxonae jūntema pana nabaru jinompame daxita jiwī.

<sup>19</sup> Tamonae pam paxam pomonaē tapaca caantobe jiwichi pam iru painya nejume cowuntsi jiwixae Jesu-cristo. Paxam jopa bewa xuya panayantomateibim tsane poxonae ichamonae abe pacata exaneiba. Jame bara saya pacopare xua bara Nacom peyantomatsiwa exanaena pomonaetha pomonaē abe pacata exana. Tsipei Nacom Pejume Diwesitha tatsi baxua yabara jeye: “Jame xan saya ba tacoyan xua jiwī atene exanan abe peexanaexae ichamonaetha. Xan peyantomatsiwa xuya exanaein pomonaetha pomonaē paca abe exana jei pon Pecanamataxeinaein jiwī”, jei Nacom Pejume Diwesitha.

<sup>20</sup> Jopa xuya payantomateibim tsane. Jame paexande xua Nacom Pejume Diwesitha tatsi jeye: “Icha painya nepaca caaitafaetabi jiton jainpa, paapare pexaewa. Yawano icha meratsipano, paapare pocotsiwa xua peapaewa. Poxonae baxua pataexanaename, bapoxonae barapon pin ura paca tsita xeinaena xua bayatha abe pia pacata exanaexae”, jei Nacom Pejume Diwesitha. <sup>21</sup> Jopa pacopatsinde xua ichamonae abe pia paca exanae coyenein tatsi paca jūntu coyene amanayaba xua daxota abe paexaname barapomonaetha pomonaē painya nepaca caaitafaetabi jiwī. Jame maisa beta exanaeya pata exande poxonae bequein ichamonae abe pacata exana. Bapoxonae pacoyene amanayabame po coyenein abe peexanae coyenewan.

## 13

<sup>1</sup> Daxita jiwi bewa exanae pocotsiwa itorobatsi pomonae itorobiya pecanamataxeinae jiwi pomonae peayapusu itorobi coyenewa xeina. Jiwi jopa itacupaetsi xua pecanamataxeinaewa ichamonae xua peitorobinexa icha Nacom jopa yabara copatsiyo baxua. Tsipei jiwi pomonae peayapusu itorobi coyenewa xeina xua pacanamataxeinaewatsi ichamonae saya meisa Nacom bara yabara cui copaba xua barapo jiwi bara pecanamataxeinaewa tsane ichamonae.

<sup>2</sup> Daxota icha ichan jume naitemata xua pocotsiwa itorobatsi xua itoroba pon piamonae itorobiya pecanamataxeinaein barapara bapon barichi jume naitemata po coyene xua Nacom exana xua poxonae cana exana xua barapomonae pecanamataxeinaewa ichamonae. Pocotsimonae xua baxua exana xua pejume naitematsiwa, barapocotsimonae apara bara Nacom tsita natsicuentatsi xua barapo abe coyenewa peexanaexae.

<sup>3</sup> Pomonae beta peexanae jiwi jopa bewa cuitaya junuwi tsane xua pecuitaya junuwiwatsi pomonae itorobiya pecanamataxeinaewi. Jame saya meisa pomonae abe peexanae jiwi bewa cuitaya junuwina xua pecuitaya junuwiwatsi pomonae itorobiya pecanamataxeinae jiwi. Icha jopa paichichipaem xua junuwa painya nepaca exanaewa pon itorobiya pecanamataxeinaein, moya jame beta patsita exande. Bapoxonae bapon bara patsita xanepanaename. <sup>4</sup> Tsipei apara pon itorobiya pecanamataxeinaein jiwi tanacuita Nacom xua painya nepaca cayawenaewa tsane. Ichitha icha paxam abe paexaname moya bara bewa pajunuware, tsipei bapon pon itorobiya pecanamataxeinaein jiwi, xeina po peayapusu itorobi coyenewatha peitacupaewatsi xua atene paca exana. Bapon tanacuita Nacom. Daxota

bapon Nacom taexainchi xua pomonae abe peexanaewi atene tsane xua penatsicuentsexae xua abe peexanaexae Nacomtha. <sup>5</sup> Daxota bewa paexanaename pocotsiwa paca itoroba pon itorobiya painya nepaca canamataxeinaein. Jopa apara bewa paexanaem tsane baxua xua poxoru Nacom atene painya nepaca exanaeyainwa, jame apara poxoru xua painya jũntũ coyenetha payabara yaputaneme xua bewa beta painya neexanaewa tsane. <sup>6</sup> Daxota xain barapomonae pacatsibame pematomatsi paratixi pocotsi paratixi jiwi bewa catsibina pomonaetha pomonae itorobiya pecanamataxeinae jiwi. Tsipei barapomonae nantawenona paratixi xua beta peexanaponaewa tsane poxonae Nacom tanacuitapoinchi.

<sup>7</sup> Daxita barapomonae barompa paratixi pacatsibare po paratixi bewa pacatsibim barapomonae. Pomonae painya nepaca canamataxeinaewi pacatsibare daxita po coyenein peyabara matomatsiwan xua xuan paca wũca. Daxita pomonae pecanamataxeinae jiwi pabarũ cui itura jinare, xua daxota betiya painya nebarũ cueicueijejewa tsane.

<sup>8</sup> Painya xoba ichamonae pantoma amanayabeibame. Jame saya cae coyene bewa paxeinaem po coyene xua nantiya painya nenaantobewam. Tsipei pon antobe ichamonae bapon jume cowũntsiya exana daxita pocotsiwa xua Moisés itoroba pia peitorobi coyenewatha. <sup>9</sup> Moisés pia peitorobi coyenewatha jeye: “Jopa pichinde ichũn piseuri tatsi. Jopa bexubinde ichamonae. Jopa caibinde xua ichamonae piawan. Jopa yabara uwinde pocotsiwa ichũn xeina”, jei barapo itorobi coyenewatha. Barapo coyenein xuaunxuae paeban, irũno daxita icha peitorobi coyenewano be cae peitorobi coyenewa jume naexanabe ichaxota xua po jumetha jeye: “Ichamonae antobeinde icha ichim xua jinya coutha naantobem”, jei barapo



peitorobi coyenewatha. <sup>10</sup> Pon ba beta antobe tsaiibi ichamonae bapana jopa abe taexanaeyo barapomonaetha. Daxota icha antobetsi ichamonae bapoxonae barapara jume cowũntsiya exainchi daxita pocotsiwa Nacom itoroba Moisés pia peitorobi coyenewatha.

<sup>11</sup> Daxita baxuan bewa paexanaename tsipei payaputaneme xua anoxuae po dapaetha pajinompame bi-chocono peayapube dapae. Barapo dapaetha tsaca pajinompare, tsipei imoxoyo naca itiya pona po mataqueitha Nacom naca capanenebiyaena. Barapo matakabi imoxoyo beyacaincha xua poxonae aena jume cowũntatsi Jesucristo. <sup>12</sup> Pequireiwa ba bewayo caewanaya poxoru matakabi dawetsina. Bara juta coyeneya ichi poxonae pomonae ba abe peexanaewi bara apara pequireitha abe exana. Barapomonae barapenta xua abe exana poxonae matakabi tsuxubi. Barichi waxainchi bewa barapentichi xua abe waexanae coyenewa icha barapomonae ichi xua saya merawi abe exana ichitha mataqueitha jopa exanaeyo. Waxainchi bewa beta exanaetsi icha pomonae ba ichi pomonae jinompa mataqueitha xua beta exana. Baxua exanatsi poxonae najũntũ coyene wũnaetatsi xua najũntũ coyene ayapusũ exanatsi abe waexanaeyainwa. Baxua icha be poxonae ba soldadopin ichi poxonae mat-  
acabitha nacui wũnaeta penabinexa. Bapon penainton-  
tha nayaitata xua daxita pepontha xua pebexotsiyain-  
watsi. <sup>13</sup> Barabũ beta xanepanaya dubenanaebiyatsi, icha jiwi ichi xua beta dubenanaebiya mataqueithaxae. Jopa bewa nacũpa exanae dubenanaebiyae tsainchi xua peamenetsaxawa. Mataũtano jopa bewa ponaeinchi po penabanaewan xua ichaxota pinmonae penacaetutsiwa yawa abe exana. Jopa bewa nasi cui exanae tsainchi. Mataũtano jopa bewa tanotsichi ichamonae piseuri jiwi tatsi. Yawano jopa bewa nantiya jume daunweya na-

jume matsontsonobi tsainchi. Matautano jopa bewa nauwi tsainchi. <sup>14</sup> Jame ichawa bewa paexanaename. Bewa Jesucristo patsipaebiname xua painya nepaca yaitatsinexa pon jiwi Pecanamataxeinaein, xua abe painya exanaeyainwa tsane. Bapoxonae jopa paexanaeinde po coyene xua abe painya exanaewam pocotsiwa painya juntu coyenein ichichipa xua peexanaewa.

## 14

*Meje yabara xua jopa bewa abeya yabara paebichi po coyene xua pejinompaewa pomonae iru* pejume cowuntsiwi

<sup>1</sup> Icha ichun juntu coyene faefaena pejume cowuntsiwa Cristotha, bapon pacana exande be painyamonae jiwi jiwana pomonae painya nejume cowuntsi jiwixae pam. Jopa bapon yabara pajume matsontsonobinde xua pia pecayabara nanta xeinaewatsi xua po coyeneya bapon bewa exanae xuano xua ichacuiitha po coyeneya xua bapon jopa bewa exanae. <sup>2</sup> Ichamonae ba nanta xeina xua itacupatsi penabanaewa xua daxita coyenein pexaewan. Ichamonae ba pomonae juntu coyene faefaena xua pejume cowuntsiwa Cristotha barapomonae ira pipexaewa xane jopa pewi xaeyo. <sup>3</sup> Pon penabanaein daxita coyeneya pexaewan, bapon jopa bewa paebi tsane ichuntha pontha pon xua jopa penabanaeinxae pewi. Jopa bewa paebi tsane “Abe exaname jopa nenabanaexae pewi”, jopa bewa jei tsane. Barichi pon pewi jopa penabanaein, bapon jopa bewa paebi tsane pontha pon pewi penabanaeinxae: “Abe exaname nenabanaexae pewi”, jopa bewa jei tsane. Tsipei pon daxita coyeneya penabanaein pexaewa Nacom yabara nanta xeina xua bara iru pexanto tatsi, icha ichi pon jopa penabanaein pewi. <sup>4</sup> Xam jopa bewa daxua paebim tsane xua pon ichun tanacuitatsi xua bapon natsicuenta pontha pon pecanamataxeinaeinchi

abe peexanaexae. Po pebin xua Nacom tanacuitatsi bapon nantauta pon jiwi Pecanamataxeinaein. Bapon jopa nantawenonaeyo xua iru xam canamataxeiname bapon. Saya meisa Nacom itacupatsi xua yabara paeba poxonae po coyene icha bapon wunaexana xua xua icha jopa xapain exanaeyo. Ichitha bapon xanepanaya exanaena tsipei Nacom itacupatsi xua cana exana, xua pia petanacuichi jiwi tatsi xanepanaya peexanaewa.

<sup>5</sup> Ichamonae nanta xeina xua caentaqueitha bichocono peainya cui matacabi beyacaincha xua icha matacabi tsipei barapo matacabitha xua Nacom wunaexana pejainchiwatsi. Ichamonae nanta xeina xua daxita matacabin bara najupa xua peainya cui matacabin xua Nacom wunaexana pejainchiwanexatsi barapo matacabintha. Daxita barapomonaewa bewa barompaya pia juntu coyenewatha yabara nanta xeinae xua barapara pexainyeiwa po coyenewa xua peyabara nanta xeinaexae. Jopa bewa nanta xeinae po coyenewa ichun yabara nanta xeina. <sup>6</sup> Pon jopa nacuichiyo po mataqueitha xua peainya cui matacabi, bapon baxua exana xua Nacom wunaexana pejainchinexatsi pon jiwi Pecanamataxeinaein. Barichi pon xua penabanaein daxita coyeneya pewi, apara xua Nacom wunaexana pejainchinexatsi, pon jiwi Pecanamataxeinaein, tsipei bapon jeye: “Nacom maisa juntu coyene weiweinan xua tanecatsiwam daxita coyeneya pexaewan”, jei. Iruno pon jopa pewi xaeyo, bapon barapara xua Nacom wunaexana pejainchinexatsi pon jiwi Pecanamataxeinaein, tsipei bapon jeye: “Nacom maisa juntu coyene weiweinan xua tanecatsiwam ira pipexaewa”, jei bapon.

<sup>7</sup> Tsipei dapon ajibi pon waxainchi jiwanatsi pomonaexaetsi pomonaewa wajume cowuntsiwichi, xua pon pepoponaewa penacanaexanaewa xua be pocotsi coyeneya bapon ichichipa. Jame apara

popona icha be pocotsi coyeneya bara Cristo pon jiwi Pecanamataxeinaein ichichipa xua pepoponaewa tsane. Barichi icha bapon tupaetsipa apara saya poxoru Jesucristo pon jiwi Pecanamataxeinaein bara copata xua bapon petupaewa tsane. <sup>8</sup> Icha Nacom pon jiwi Pecanamataxeinaein copata xua awiya wajinompawatsi bewa beta jinompaetsi xua daxota jiwi Nacom wunae pejainchinexatsi. Icha Nacom pon jiwi Pecanamataxeinaein copata xua bara watupaewa tsane barapo coyene bewa cana exanaetsi xua jiwi wunae pejainchiwa Nacom. Daxota bequein icha waxainchi jinompaetsipatsi, yawano poxona bequein icha tupaetsipatsi bara barapara barapo coyeneinya waxainchi bewa cana exanaetsi xua jiwi Nacom wunae pejainchinexatsi pon jiwi Pecanamataxeinaein poxoru waxainchi piamonae tatsichi. <sup>9</sup> Daxota Cristo tupa, yawano equeicha asu popona xua penaexanaenexa tsane pon jiwi Pecanamataxeinaeinchi xua daxita jiwi nexa pomonae werapa irano pomonae cataunxuae jinompano.

<sup>10</sup> Daxota dapon ajibi pon paxam jiwana pam pon bewa yabara paebina pomonaetha pomonae iru pejume cowuntsiwi Cristo, xua pejeiwa: “Barapomonae Nacom tsita natsicuentatsi abe peexanaexae bapontha”, xua pejeiwa. Matautano ichamonae paxam jiwana jopa bewa yabara paebi tsane pomonaetha pomonae iru pejume cowuntsiwi, xua jei: “Maisa barapomonae jopa peyaputaewi xua jopa peainya cui jiwi”, jopa bewa jei. Tsipei poxoru daxita waxainchi bexa tsane umenaeinchi Cristo peitabaratha. Cristo daxita naca yabara paebina xua wanatsicuentasiwa xua abe waexanaexae Nacomtha. <sup>11</sup> Tsipei Nacom Pejume Diwesitha jeye:

“Xan bara xaniwaicha yabara paca tsiwunae  
muxu dutatsi xua daxita jiwi patsina xua

pentabocotha peumenaenexa taitabaratha  
tanewūnae jainchinexa.

Daxita jiwi neyabara paebina jei tsane:

‘Apara barapon yatsicaewa pepa Nacom’, jei  
tsane”, jei Nacom pon jiwi

Pecanamataxeinaein xua Pejume Diwesitha.

<sup>12</sup> Bapoxonae barapo mataqueitha yabara cueicueije  
tsainchi Nacomtha pocotsiwa xua caena bayatha exanatsi  
xua barapo cae pin nacuathe icha bara metha wūnae  
exainchi yawano icha bara metha abe exainchi.

*Meje yabara xua jopa bewa exanaetsi pocotsi coyeneya  
pomonaē pejume cowūntsiwi abe peexanaewa tsane*

<sup>13</sup> Daxota waxainchi jopa bewa yabara nantiya namux-  
utainyabichi pocotsiwa waexanaexae. Jame bewa paex-  
anaem xua meje: Painya xoba pacana exaname painya-  
monae pomonaē irū pejume cowūntsiwi xua pocotsi  
coyeneya barapomonaē peexanaewa tsane xua dax-  
ota jopa pejume cowūntsiwa tsane Nacom. <sup>14</sup> Tsipei  
xan tajume cowūntsixae Jesús pon jiwi Pecanamatax-  
einaein daxota bara yatsicaya yaputan, xua dapocot-  
siwa ajibi po pexaewa tanejūntū coyene taxobiwa xua  
icha taxaewa tsane. Ichitha icha ichūn yabara nanta  
xeina xua po pexaewa betaxobichipatsi icha xaetsipa  
bapoxonae bara tsita xainyeichi, betaxobichipatsi icha  
xaetsipa. <sup>15</sup> Ichitha icha paxaetsipame pocotsiwa xua  
painya jiton jopa ichichipaeyo xua pexaewa, pon irū  
pejume cowūntsin bapoxonae peantobe coyenewa jopa  
patsita xeinaem bapon. Painya xoba paexaname pocotsi  
coyeneitha xua ichūn baraxuba Nacom xua poxoru pocot-  
siwa painya nexaexae. Tsipei apara Cristo bayatha tsitūpa  
bapon. <sup>16</sup> Paxam pananta xeiname xua bara wūnae  
paexaname po coyenein ichamonae tsita abetsi pejūntū  
coyenein taxobixaetsi. Bequein baxua payabara nanta

xeinaetham tsipae ichitha jopa paexanaemtsipae barapo coyenein. Tsipei icha paexanaetsipame barapo coyenein, ichamonaе yabara jei tsipae barapo coyenein: “Maisa po coyenein barapomonaе exana bichocono abe”, jei tsipae. <sup>17</sup> Nacom ichichipa xua waxainchi peburuya junteма wajinompaeва. Daxota poxonaе Nacom naca itoroba po coyene yabara po coyeneya bewa nabaru jinompaeinchi, jopa yabara paebi tsainchi xua po peitorobi coyenein xua waxaewa yawa waapaewa yabara. Jame po coyenein yabara naca itoroba xua apara jame pinae bewa Nacom tsita xeinaeinchi pejuntu coyene xanepanaewa. Matautano bewa pinae junteма nabaru jinompaeinchi Nacom nexa. Matautano bewa juntu coyene weiweinaeya jinompaeinchi. Daxita barapo coyenein xeinatsi wanaca catsibixae Nacom pia Pejumope tunaxu tatsi. <sup>18</sup> Poxonaе barapo coyeneya Cristo taexainchi bapoxonaе Nacom tsita xanepanatsi pocotsiwa xua exainchi. Matauta jiji naca yabara paeba xua pinae bara beta exainchi.

<sup>19</sup> Daxota bewa waxainchi exaneibinchi pocotsi coyenein xua junteма nabaru jinompatsi exanatsi. Yawano bewa exaneibinchi pocotsi coyeneintha xua nantiya jume cocowuntaponatsi naexainchi. <sup>20</sup> Jopa bewa paxaem ichun peitabaratha pon painyamonae jiwana pocotsiwa xua bapon yabara nanta xeina xua jopa bewa xae. Icha paxaetsipame bapon peitabaratha, bapon iru metha xaetsipa barapo pexaewa. Bapoxonaе bapon nanta xeinaetsipa xua bapon pomonaе jiwana pomonaе penatsicuentsiwa Nacomtha xua abe peexanaexae. Painya xaexae bapon pacana exaname xua jopa beta pejume cowuntsiwa Nacom. <sup>21</sup> Jame pocotsiwa xua xanepanaya painya neexanaewa tsane meje baxue: Jopa bewa paxaem pewi. Matautano jopa bewa paapaem peamenetsaxawa. Matautano jopa bewa paexanaem

pocotsi coyenewatha painya jiton exanaena pon iru pejume cowuntsin Cristo xua abe peexanaewa tsane. <sup>22</sup> Icha paxam pajume cowuntame xua bara Nacom paca copata xua bara painya nenabanaewan daxita coyeneya pexaewan, po pexaewan jopa paca juntu coyene taxobiyo saya jame meisa Nacomtha yabara patsipaebare baxua. Painya xoba ichamonae yabara patsipaebame pexaewa po pexaewa barapomona jopa bapana xae. ¡Maisa juntu coyene weiweina pon daxita coyeneya pexaewa penabanaein pon pia juntu coyenewa jopa tsipaebichi xua pinae penatsicuentisiwa xua abe peexanaewaxae Nacomtha poxona barapo pexaewa xane! <sup>23</sup> Pon yabara ainya unthuton xeina xua pocotsiwa penabanaewan, bapon barapara pia coya natsicuenta Nacomtha xua abe exana xua poxona daichitha xane barapo pexaewa. Daxota daxita pocotsiwan waxainchi exanatsi icha jopa beta yabara jume cowuntichi xua waexanaewa pocotsiwa Nacom ichichipa bapoxona barapara abe exanatsi, poxona baxuan exanatsi.

## 15

*Meje yabara xua pocotsiwa bewa exanaetsi xua ichamonae tsita xanepanatsi*

<sup>1</sup> Waxainchi pomonaetsi pomona ajuntucoyenesutsi xua wajume cowuntsiwa Cristotha. Daxota bewa yawe-naetsi pomona xua juntu coyene faefaena xua pe-jume cowuntsiwa Cristotha xua barapomona awiya jume cowuntsina. Jopa meisa bewa exanaetsi pocotsiwa xua waxainchi wacoya ichichipatsi. <sup>2</sup> Daxita waxainchi bewa exanaetsi pocotsi coyenewa tsita coyene xanepanatsi pomona ichamonae pomona iru pejume cowuntsiwi

pocotsi coyenetha xua barapomonaē yawenatsi xua pe-  
 jume cocowuntaponaenexa. <sup>3</sup> Tsipei Cristo jopa ex-  
 anaeyo xua pia coya ichichipa pocotsiwa tsita coyene  
 xanepanatsi. Jame saya bapon yabara jume cui co-  
 patatsi xua jiwi bapon atene peexanaewatsi poxonaē  
 abe yabara paebatsi. Jiwi Cristo bara barapo coyeneya  
 cana exanatsi icha be pocotsi coyeneya caena bayatha  
 Cristo yabara paebatsi Nacom Pejume Diwesitha xua  
 Cristo jeye Nacomtha: “Poxonaē jinya necaitafaetabi  
 jiwi abeya cayabara paeba, barichi barapara xan berena  
 abeya neyabara paeba”, jei Cristo Nacomtha. <sup>4</sup> Daxita  
 xua pocotsiwan caena bayatha tina Nacom Pejume Di-  
 wesitha, baxuan yabara tina xua wanaca cuidubinexa  
 Nacom yabara. Baxuan naca cuiduba xua Cristo wawūnaē  
 ewatsinexa. Xeinatsi baxua poxoru Nacom Pejume Diwesi  
 naca cana exana xua jopa dapo coyene xeinaetsi xua  
 bepijawa aitaconaetsi xua bequein ichamonae abe nacata  
 exana. Yawano barapo diwese naca cana exana xua  
 najuntū coyene tsacabatsi xua wajume cowanta dube-  
 nanaebiyawa. <sup>5</sup> Nacom bapon naca cana exana xua  
 jopa bepijawa aitaconaetsi yawano xua naca juntū coyene  
 tsacaba exana. Barabū barapon Nacom paca yawena  
 xua peburūya nanta jūpiya pananta xeiname xua painya  
 nabarū exanaewa tsane, icha be pocotsi coyeneya Cristo  
 Jesús exana. <sup>6</sup> Barabū be caemonaē pana nabarū wūnaē  
 jaintame Nacom, pon Jesucristo Paxa tatsi, pon Jesucristo  
 Wanacanamataxeinaein.

*Meje yabara xua po coyene pomonaē jopa judiomonaē naex-  
 anaeyo tsipaebatsi Nacom pia pecapanenebiyae diwesi jume*

<sup>7</sup> Daxota icha Cristo naca ichi xua naca matenta wey-  
 ataeya waba, paxam bara paichinde. Nantiya pana nan-  
 tenta weyataeya wabeibare xua bapoxonaē jiwi wūnaē  
 pejainteibinexa Nacom painya neexanaewamxae baxua.



<sup>8</sup> Xan paca tsipaebatsi xua Cristo patopa xua judiomonae peyawenaenexatsi. Cristo baxua exana xua tsita itapeinya xeina xua Nacom bara exana pocotsiwa bapon exana-paeba. Matautano Cristo baxua exana pia nayabara jume cui wetsinexa pocotsiwa bayatha Nacom yabara tsiwuna muxu duta wamo susato jiwitha. <sup>9</sup> Yawano Cristo daxota patopa xua pomonae jopa judiomonae naexanaeyo wuna pejainchinexa Nacom xua Nacom wunaeya peyabara nanta xeinaexae xua peyawenaenexa barapomonae. Nacom Pejume Diwesitha baxua yabara jeye xua Cristo paeba paxatha:

“Wuna cajaintatsi daxita nacuan jiwitha pomonae jopa judiomonae naexanaeyo pia xantha tatsi. Wuna cajaintatsi xua poxonae cata naxunatsi”, jei Nacom Pejume Diwesitha xua Cristo Paxatha paeba.

<sup>10</sup> Equeicha Nacom Pejume Diwesitha jeye:

“Barabũ daxita nacuan jiwi caemonae nabarũ jũntũ coyene weiweinaena pomonae Nacom itapeta xua pecana exanaenexa piamonae tatsi”, jei Nacom Pejume Diwesitha.

<sup>11</sup> Equeicha Nacom Pejume Diwesitha jeye:

“Barabũ daxita pam pomonae jopa judiomonae naexanaeyo pam wuna pejainchiname pontha pon jiwi Pecanamataxeinaein. Matautano barabũ daxita nacuanpiwi wuna jainchina bapontha”, jei Nacom Pejume Diwesitha.

<sup>12</sup> Equeicha Nacom Pejume Diwesitha xua Isaías tatina, jeye:

“Pebin patopaena pon Isái pia pemomoxi susato jiwi jiwana tatsi, pon David paxa tatsi.

Bapon Nacom cana exana xua bapon itorobiya pecanamataxeinaenexa tsane pomonae jopa judiomonae naexanaeyo. Barapomonae jume cowuntsiya wɔnae ewatsina xua barapon barapomonae pecapanenebiwa tsainchi abe pia peexanaexae cuiru coyenein weya tatsi”, jei Isaías Nacom Pejume Diwesitha.

<sup>13</sup> Barabɔ Nacom pon naca cana exana xua wawɔnae ewatsiwa Cristo bichocono paca jɔntɔ coyene weiweina exanaena. Matautano barabɔ Nacom jɔntema jinompa paca cana exanaena. Nacom baxua pacata exana painya nejume cowuntsixae bapon. Bapoxonae barabɔ Nacom paca cana exana xua jopa juniya painya newɔnae ee-wataponaewa tsane Cristo. Nacom pia Pejumope tɔnaxɔ tatsi baxua paca cana exana pia peayapusɔ itorobi coyenewatha.

<sup>14</sup> Tamonae pam, paxam pomonae irɔ painya nejume cowuntsixae Jesucristo. Bara xaniwaicha beta yaputan, xua paxam beta painya neexanaewam po peantobewa xuaunxuae yabara paca tsitinatsi. Matautano paxam payaputaneme daxita xua pocotsiwa bewa paexanaename. Matautano payaputaneme xua po coyene bewa nantiya pana namuxuwetsim. <sup>15</sup> Barapo cartathe pecono jumeyotha atsaquiya pacata tinatsi. Baxuan xua pocotsiwan pacata tinatsi jopa ichipaeinyo xua painya ne-jɔntemainaewa. Daxota atsaquiya pacata tinatsi baxuan Nacom tanebarɔ cui itura jinaexae poxonae necata barapo tanacuichiwa. <sup>16</sup> Nacom neitoroba xua Jesucristo tatanacuichinexa tayawenaenexa pomonae jopa judiomonae naexanaeyo. Tanacuitan Nacom poxonae cueicueijan Nacom pia pecapanenebiyae diwesi jume pomonaetha pomonae jopa judiomonae naexanaeyo. Barapomonae pejume cowuntsixae Cristo, Nacom pia Peju-

mope t̄nax̄u tatsi cana exana xua barapomonae pe-  
j̄nt̄u coyene xanepanaewa Nacomtha. Po coyene ex-  
anan baxua be po coyene icha sacerdotemonaepin ichi.  
Poxonae bapon duwei jiwi tsitautatsi abe pia peexanae  
coyenein nexa tatsi bapoxonae barapo jiwi Nacom petsita  
j̄nt̄u coyene xanepanaewichi.

<sup>17</sup> Tajume cow̄ntsixae Cristo Jesús daxota  
bichocono netsita xanepana xua tataexanaexae barapo  
penacuichiwa xua Nacom nexa. <sup>18</sup> Jopa yabara paebinyo  
xua Cristo exana ichamonae nexa. Saya meisa bichocono  
netsita xanepana pocotsiwa xua Cristo exana xan  
nexa. Cristo neyawena xua pomonae jopa judiomonae  
naexanaeyo pejume cow̄ntsinexa Nacom. Barapomonae  
Nacom jume jejeichi poxonae jume tane pocotsiwa  
cueicueijan xuano xua tane pocotsiwan xua exananno.

<sup>19</sup> Nacom neexana xua pia Pejumope t̄nax̄u tatsi  
pia peayapus̄u itorobi coyenewatha exanan pexeinya  
petsita it̄bi coyenewan po coyene jiwi j̄nt̄u coyene  
nabenaeca cana exainchi. Daxota poxonae Jerusalén  
tomara wewarapiyan daxita jiwitha cueicueijan tsoponae  
Nacom pia pecapanenebiyae diwesi jume xua Cristo  
yabara. Baxua exanan beya Iliria nacuatha yacui jopan.

<sup>20</sup> Daxota ichichipeiban xua tacueicueijeiva Nacom  
pia pecapanenebiyae diwesi jume xua Cristo yabara  
ichaxota cataunxuae jiwi jopa yabara jume taeyo Cristo.  
Jopa becueicueijanyo Nacom Pejume Diwesi ichaxota  
ichamonae copiya bayatha cueicueijeiva barapo diwesi.

<sup>21</sup> Poxonae xan baxua exanan, exanan be pocotsiwa  
bayatha Nacom Pejume Diwesitha pepaebixae, xua Cristo  
yabara jeichichi:

“Pomonae cataunxuae jopa tsipaebichi po diwesi  
xua bapon peyabara paebiwatsi, barapomonae  
jume taena, xua bapon yabara jume taeinchi.

Bapoxonae barapomonae yaputaena po diwesi  
 xua bapon peyabara paebiwatsi xua daxota  
 bapon jume cowuntsinchi”, jei  
 Nacom Pejume Diwesitha tatsi.

*Meje xua poxonae Pablo paeba xua pinae beponaena Roma tomara beya*

<sup>22</sup> Ichamonae tatsipaebaponaexae barapo diwesi jopa neitacupaeyo xua tapaca casiwa ponaewatsi. Bequein bayatha ichichipeiban xua tapaca casiwa ponebiwa tsainchi ichitha jopa neitacupeibiyo. <sup>23</sup> Ichitha anoxuae wetan barapo penacuichiwa daxita barapo nacuanthe. Caena bayatha ainya wei ichichipeiban xua tapaca casiwa ponebiwatsi. <sup>24</sup> Anoxuae ichichipan xua tapaca casiwa ponaewa tsainchi poxonae warapaein España nacua beya. Poxonae paxam panejuntu coyene weiweina cana exanaenameba xua tapaca casiwa ponaexaetsi equeicha warapaein España nacua beya. Ichichipan xua tapana neyawenaewam tsane pocotsiwa nantawenonan tawarapaewanexa poxonae painya tomara weya ponaein. <sup>25</sup> Ichitha anoxuaetha copiya ponaein Jerusalén tomara beya. Capanaein pocotsiwa xua barapo Jerusalén tomarathapiwi peyawenaewatsi, pomonae iruru pejume cowuntsiwi Cristo. <sup>26</sup> Macedonia nacuapiwi iru Acaya nacuapiwi pomonae pejume cowuntsiwixae Cristo daxita barapomonae pia coya juntucuru exana po coyene tsita coyene xanepanatsi. Barapomonae taitoroba paratixi Jerusalén tomarapiwi nexa, pomonae peacopeibiwi pomonae iru jume cowanta Jesús icha paxam paichim. <sup>27</sup> Barapo pejume cowuntsiwi pomonae Macedonia nacuapiwi iru Acaya nacuapiwi barapomonae juntucuru nanta xaina pia coya xua peexanaewa baxua. Barapomonae jopa itorobichi ichun. Ichitha barapomonae bewa yawenaena pomonaetha pomonae

acopeibiwi. Barapomonae pomonae jopa judiomonae naexanaeyo jume tane Nacom pia pecapanenebiyae diwesi jume poxoru bayatha judiomonae yawena pecueicueijeixae barapo diwesi barapomonaetha. Daxota anoxuae pomonae jopa judiomonae naexanaeyo bewa xuya yawenae barapomonaetha judiomonaetha pocotsiwantha xua barapomonae pexeinaexae Nacom weya. <sup>28</sup> Daxota poxonae wetsin barapo penacuichiwa xua catsin daxita barapo paratixi Jerusalén tomarapiwitha, bapoxonae ponaein España nacua beya. Paca siwa ponaeinchi copiya, bapoxonae bara beya warapaein España nacua beya. <sup>29</sup> Bara xaniwaicha yaputan xua poxonae paca siwa ponaeinchi, Cristo necatsina po diwesi paxam nexa po diwesi bichocono paca tsita juntu coyene xanepana xua daxota painya nejuntu coyene weiweinaewa tsane.

<sup>30</sup> Tamonae pam, paxam pomonae iru painya ne-jume cowuntsiwixae Jesucristo. Paca wucatsi xua be caemonae panaexande xua ajumesuya daunweya painya pana nebaru tsipaebinexa Nacomtha xua bapon tana neyawenaewa tsane xua tatanacuichiwa bapon. Baxua paca wucatsi iru painya jume cowuntsixae Jesucristo pon Wanacanamataxeinaeinxae. Barichi paca wucatsi iru painya xeinaexae po peantobe coyenewa Nacom pia Pejumope tunaxu tatsi naca cata. <sup>31</sup> Nacomtha painta tsipaebare xua jopa abe tana neexanaenexa pomonae Judea nacuatha pejinompaewi, pomonae jopa pejume cowuntsiwi. Matautano Nacomtha painta tsipaebare xua barapo Jerusalén tomarapiwi pomonae pejume cowuntsi jiji tanententa cobe wenotsinexa barapo paratixi. <sup>32</sup> Bapoxonae icha Nacom ichichipaena juntu coyene weiweinaya paca siwa patopaeinchi. Matautano nafifina caewatsin xua tapaca casiwa ponaewatsixae

tsainchi. <sup>33</sup> Barabũ Nacom pon jũntema jinompa naca cana exana paca barũ poponaena daxita. Je, bara ichi tsane.

## 16

### *Meje yabara poxonae Pablo jacoba Roma tomarapiwi*

<sup>1</sup> Anoxuae yabara paca tsipaebatsi powa pewũn Febe, powa beta peexanaewayo. Bapowa paca siwa ponaena. Bapowa be wamcho watsicotaewa irũ pejume cowũntsixae Jesús. Barapowa Nacom tanacuitatsi xua yawenatsi pomonaе pejume cowũntsi jiwi Cencrea tomaratha. <sup>2</sup> Barapowa wũnaeya parenta weyataeya wabare Jesucristo piamonaе jiwanaxae pon Wanacanamataxeinaein. Baxua bewa paexanaem icha pomonaе pejume cowũntsiwi ichi xua bewa nantiya nantenta weyataeya wabeibina. Barapowa payawende xua pocotsiwa barapowa nantawenona, tsipei barapowa bayatha yawena nawita pin bicheitomonaе. Yawano barapowa bayatha irũ neyawena.

<sup>3</sup> Painta jacobare powa pewũn Prisca. Irũ painta jacobare, pia pebin tatsi, Aquila, tsipei barũ nacuitanbe barapo tanacuichiwa po coyenein exanan Cristo Jesús nexa. <sup>4</sup> Baraponbe bara muxu petũpaebe tana necapanepaenexabe poxonaе ichamonaе juntucuru muxu tana nebexubi. Daxota xan baranbe: “Maisa jũntũ coyene weiweinan xua tapaneyawenaemxaebe”, jan. Barichirũ daxita pomonaе Nacom pejume cowũntsiwichi pomonaе jopa judiomonaе naexanaeyo pomonaе Nacom petsita nacaetutebiwichi xua wũnae pejainteibinexatsi, jeye: “Maisa pajũntũ coyene weiweinan xua paxambe pana neyawenama xua Pablo jopa petũpaewa”, jei. <sup>5</sup> Irũno painta jacobare pomonaе nacaetuta Prisca pia pebinbe pia botha tatsibe. Mataũtano painta jacobare Epeneto

pon tajiton, pon bichocono antobein. Bapon pon copiya jume cowanta Cristo Asia nacuaatha. <sup>6</sup> Matautano painta jacobare María. Barapowa powa bichocono pacata nacuita. <sup>7</sup> Matautano painta jacobarebe Andrónico iru Junias ponbe iru judiomaepinbe icha xan ichin. Baponbe neyawa baru muxuna etabe jiwi pecubi botha. Matautano baponbe Jesucristo pia peitorobi jiwi tatsi jiwanaabe. Jiwi beta yaputaena xua baponbe bara Jesucristo pia peitorobi jiwi jiwanaabe tatsi. Baponbe caena bayatha netsiwana jume cowantabe Cristo.

<sup>8</sup> Painta jacobare Ampliato pon tajiton, pon bichocono antobein, pon iru pejume cowantsixae pontha pon jiwi Pecanamataxeinaein. <sup>9</sup> Painta jacobare Urbano, pon xua naca baru muxuna tanacuita Cristo. Matautano painta jacobare Estaquis, pon tajiton, pon bichocono antobein. <sup>10</sup> Painta jacobare Apeles, pon tsita itapeinya xeineiba xua bapon bara xaniwaicha Cristo pejume cowantsiwatsi poxonae bequein abe taexaneibatsi ichamona. Matautano painta jacobare Aristóbulo piamona tatsi. <sup>11</sup> Matautano painta jacobare Herodión pon iru judiomaepin icha xan ichin. Iru painta jacobare Narciso piamona tatsi pomona pejume cowantsixaeru pontha pon jiwi Pecanamataxeinaein. <sup>12</sup> Iru painta jacobare powa Trifena iruno powa Trifosa. Barapowayobe, powayobe iru tanacuitabe xua pon jiwi Pecanamataxeinaein tanacuitatsibe. Iru painta jacobare Pérsida powayo tajitowayo, powayo antobein iruru pejume cowantsixaeru. Barapowa iruru nawita daunweya tanacuitaru xua pon jiwi Pecanamataxeinaein daunweya tanacuitatsi. <sup>13</sup> Iruno painta jacobare pon Rufo. Bapon pon jiwi Pecanamataxeinaein itapeta, Rufo itapetatsi xua xanepanaya petanacuitsinexatsi. Iruno painta jacobareno bapon Rufo pena tatsi, powa iru be taena tsicotan. <sup>14</sup> Iru painta jacobare pon Asíncrito, iruno

pon Flegonte, iruno pon Hermes iruno pon Patrobas, iruno pon Hermas. Iruno painta jacobare daxita pomonae iru pejume cowuntsiwixae Cristo pomonae xua baru jinompatsi barapomonae. <sup>15</sup> Matautano painta jacobare pon Filólogo. Iruno painta jacobare powa Julia. Iruno painta jacobare pon Nereo, iruno Nereo pamcho tatsi. Iruno painta jacobare pon Olimpas. Matautano painta jacobare daxita pomonae iru pejume cowuntsiwixae Cristo, pomonae baru jinompatsi barapomonae.

<sup>16</sup> Betiya painta nantiya pana nacobe najacobare painya neantobewaxae Cristo. Daxita barapomonae pomonae Cristo pejume cowuntsiwichi pomonae xote jinompe, daxita barapomonae paca jacobá.

<sup>17</sup> Tamonae pam, paxam pomonae iru painya nejume cowuntsiwixae Jesucristo. Paxam paca muxuwetatsi xua dota pam painya necui naitaewatsinexa pomonae xua tsana paca necaexanae jiwi xua ainya bicheitobe paca cana exana. Barapomonae pacata ayapube exana xua painya nejume cowuntsiwa Cristo. Barapomonae catsawa yabara jume toxechiya exana xua Jesucristo pia pecuidubi coyenewa tatsi xua bayatha pocotsiwa pana nacuidubame. Maisa barapomonae tajú pajume cuitaya ponde. <sup>18</sup> Barapomonae jopa tanacuichiyo xua Jesucristo jopa tanacuichichi pon Wanacanamataxeinaein. Barapomonae saya nacuita xua saya pia coutha peexanaenexa xua pocotsiwa barapomonae ichichipa xua peexanaewa. Barapomonae muxujainyaba nawita pomonae aetha pomonae be conotha peyaputae jiwi xua abe peexanae coyene yabara. Baxua exana po jumeintha xua pe-einya jumein yawa po jumeintha itara mexeya bara jume xanepana, ichitha jopa pexainyei jume. <sup>19</sup> Daxita jiwi paca yaputane xua paxam paexaname pocotsiwa Nacom paca itoroba pejume diwesitha. Daxota bichocono juntu



coyene weiweinan. Ichichipan xua painya nexainaewa tsane painya neyaputae coyenewan po coyenewan xua pexanepanae coyenein painya neexanaenexa. Matautano ichichipan xua jopa painya neexanaewa tsane icha be ichi xua poxonae exana pomonae jopa peyaputaewi, xua jopa abe painya neexanaewa tsane. <sup>20</sup> Nacom bapon apara pon juntema jinompa naca exana. Barapon aunxuae paca yawenaena xua painya neamanayabiwa tsane pon bichocono abe peexanaein, bapon Satanás. Barabũ Jesús, pon Wanacanamataxeinaein, paca yawenaena pia paca necaantobexae.

<sup>21</sup> Irũno Timoteo paca jacobã pon nebarũ nacuita Jesucristo nexa. Matautano pon Lucio, irũno pon Jasón, irũno pon Sosípater, barapoyobe paca jacobã. Barapoyobe irũ judiomoaepinbe, icha xan ichin.

<sup>22</sup> Xan Tercio, barapo carte saya tatinan Pablo. Xan bapon irũrũ paca jacobãtsi irũrũ taantobexae pon jiwi Pecanamataxeinaein.

<sup>23</sup> Irũrũ pon Gayo bapon paca jacobã. Xan Pablon bapon Gayo pia botha tatsi anoxuae poponan. Baxota pia botha tatsi tanacaetutatsi pomonae pejume cowũntsi jiwi, Nacom wũnae pejainchinexatsi. Irũno Erasto paca jacobãrũ pon paratixi peenaein Corinto tomaratha xua Corinto tomarapiwi pia paratixi tatsi. Irũno Cuarto bapon paca jacobã, pon irũ pejume cowũntsin Cristo.

<sup>24</sup> Barabũ Jesucristo, pon Wanacanamataxeinaein, daxita paxam paca yawenaena pia paca necaantobexae. Je, bara ichi tsane.

*Meje xua Pablo Nacom wũnae jaintatsi poxonae najume opi duta exana barapo carte*

<sup>25</sup> Barabũ wũnae jaintatsi Nacom. Nacom itacũpatsi xua paca ajũntũyapusũya cana exana xua beta painya nejume cowũntsinexa barapo pexeinya pecapanenebiyae diwesi jume coyenewathaxae. Barapo diwesi Jesucristo

yabara cueicueijan. Caena bayatha poxonae Nacom aena nacua forota, barapo pexeinya pecapanenebiyae diwesi jume Nacom cataunxuae jopa tsita jume itapeinya xeinaeyo, tsipei abũ be namicha jume yawũn xeina xua jiwi jopa yaputaeyo. Ichitha anoxuae Nacom tsita jume itapeinya xeina barapo diwesi. <sup>26</sup> Barapo pexeinya pecapanenebiyae diwesi jume, anoxuae jiwi barapo diwesi yaputane, Nacom pia peitorobi jume pepaebiwi peyabara tinaexae barapo pexainyei jume diwesi. Mataũtano jiwi yaputane poxoru Nacom peitorobixae, pon xua ataya tsitecaeya popona. Barapo diwesi Nacom jume tane exana daxita nacuanpiwitha, xua barapo jiwi pejume cowũntsinexa Cristo. Mataũtano jume tane exana xua barapo jiwi peexanaewa tsane pocotsiwa Nacom itoroba.

<sup>27</sup> Barabũ Nacom wũnae jaintatsi, pon meisa compa yatsicaewa daxita peyaputaein. Jesucristo naca cana exana xua Nacom wũnae wajainchiwa xua ataya nexa. Je, bara ichi tsane.

Baja Pablo.

Nacom Pejume Diwesi po diwesi pena jume diwesi xua  
Jesucristo yabara tinatsi  
New Testament in Cuiba

copyright © 2010 Wycliffe Bible Translators, Inc.

Language: Cuiba

Translation by: Wycliffe Bible Translators, Inc.

### Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuiba

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

